

INSAIT

Spakbrus na gan hevi kamap strong long Bogenvil...

Pes 5

Ol Wol nius poto...

Pes 14 na 15



Laki tru!...

KAR BAM: Planti laip i save lus long rot taim kar i bam. Laki tru na dispela kar i bam, tasol nogat laip i lus. Liklik mangi husat i stap insait long kar i flai lusim han bilong papa na go pas long glas bilong dispela kar. Dispela rot birua i kamap long wanpela liklik han rot long Gordons klostu long polis bareks long Mosbi. Dispela rot i gat nem nogut long kamapim ol rot birua planti taim pinis. Poto Nicky Bernard

Gavman lus tingting long Bogenvil - Akoitai

AKOITAI: Bogenvil no kisim gutpela sapot.



GAVMAN i lusim tingting long Bogenvil Pis Agrimen (BPA) em i kamapim long 2005.

Tingting bilong gavman nau i stap long ol arapela samting olsem PNG LNG na ol maining wok tasol Bogenvil i stap long bak-sait, bipo Memba bilong Sentral Bogenvil na sinia man long ailan, Sam Akoitai, i tok.

Em i tok BPA i gat tripela hap we i holim em:

- **WEPON Disposel- rausim ol samting bilong pait olsem gan;**
- **ATONOMI, gavman em i gat long nau; na**
- **REFERENDUM, holim vot long kamap indipenden.**

Em i tok wok bilong tupela namba wan tok i kamap pinis o i wok long kamap yet; ol manmeri i pasim pait, rausim gan na Bo-

genvil i gat Atonomus Gavman (ABG).

Tasol wok bilong namba tri tok i kamap klostu na nesanel gavman na ABG i no redi.

Long dispela Akoitai i tok em i askim ol lidaman long nesanel gavman na ABG long sindaun na stretim ol tok.

Em i tok long BPA tok, bihain long 15 i go long 20 yia taim, Bogenvil i mas holim referendum, dispela long 2015 o 2020.

Tasol ol wok kamap i no soim Bogenvil i redi long mekim olsem.

"Mi no amamas long ol tok pait namel long presiden bilong ABG na rijinel memba.

I go moa long pes 3

FRI
bihain long 2pela
SMS

Salim tupela sms. kisim 18 Fri sms



Kisim 20 teks long prais lo tupela teks tasol!

Sapos yu salim tupela teks namel long 7am monin na 9:59pm nait bai yu kisim 18 teks fri behain long em.

Digicel

Bipela, Storpela moa Nerus bilong PNG.

Digicel Tems na Kondisen bai stap.

GLOBE BRAISED STEAK & ONIONS

More Easy
More Tasty
More Energy



GLOBE ...the perfect choice

PNG Oposisen i tok toktok bilong Somare long stat wok ken i wanpela 'joke'

OPOSIEN Pati bilong Papua Niugini i tok kam bek bilong Sir Michael Somare olsem Praim Minista bilong kantri i wanpela 'joke'.

Sir Michael i bin lusim wok long mun i go pinis long larim wanpela lidasip trai-

bunel i ken kirapim wok painimaut i go long ol toktok i sut long en long i no stretim ol fainensal riten bilong em.

Tasol nau, opis bilong em i tok em bai stat wok gen olsem praim minista bihain long em i kisim 5-pela wik holide.

Sinia oposisen memba, Belden Namah, i tok ol Papua Niugini pipel i no longlong long dispela senis long stori

bilong Somare.

"Ol Papua Niugini i no ia pas. Ol i harim yu. Ol i harim yu taim yu lusim wok bikos ol i riferim yu i go long kot bilong lida. Watpo yu kam bek na senisim stori bilong yu na tok olsem yu stap holide tasol."

I kam inap nau, Sir Michael i no yet mekim wanpela toktok long pablik watpo em i laik go bek long opis bilong praim minista.

PNG i givim 'green light' long namba wan wok solwara maining

PAPUA Niugini i givim pinis wanpela maining laisens i go long wanpela kampani bilong Keneda (Canada) em ol i laik kamap namba wan kampani long wol long main na dikim floa bilong solwara.

Nautilus Minerals nau ol i givim em wanpela laisens long mainim kopa na gol insait long 59 skwea kilomita eria bilong Bismark Si.

Ol i bilip dispela eria i ken produsim samting olsem 800,000 tan hevi bilong kopa na klostu 200,000 auns bilong gol long wan wan yia.

PNG gavman nau i gat wanpela mun long pasim tok sapos em bai baim wanpela hap bilong dispela projek long 30 pesen samting.

Prodaksen wok ol i ting bai stat long pinis bilong 2013 o long yia 2014.



EKSIDEN NA IMEJENSI WOD WOK STRETIM:
Pot Mosbi Jenerel Haus sik wok stretim long Eksiden na Imejensi Wod i bin stat long las yia na i go het yet. Ol kontrakta i skruim wok na stat long las wik, ol i pasim Autpesen seksen we pablik long siti i sik i save lukim ol dokta na kisim marasin tu. Lukim moa stori long dispela long Pes 8.

Malabag askim gavman long apim pe bilong wokman

Paul Zuvani i raitim

I GAT bikpela baret namel long pe bilong ol lidaman na ol wok manmeri nating.

Dispela i no gutpela long wanem em i mekim wanpela grup i karim planti hevi, presiden bilong Pablik Sevis Asosiesen, Michael Malabag, i tok.

Em i mekim dispela tok long bung bilong asosiesen long Crowne Plaza Hotel, Mosbi long aste.

Em i mekim dispela tok long bekim disisen bilong gavman long las Palamen kibung long apim pe bilong ol memba bilong palamen na hetman bilong ol dipatmen na oganaisesen long wan handret pesen.

Dispela i min sapos wanpela hetman bilong Dipatmen i kisim K3,000 long fotnait nau em bai kisim K6,000.

Wantaim pe i gat pasin olsem ol lidaman o hetman bilong ol

oganaisesen i ken kisim mani o sevis long kain opis ol i holim o lukautim.

Na dispela i ken lukim ol i ken go moa long K8,000 o K9,000.

Long dispela taim wanpela opisa nating i ken kisim olsem K700 o K800.

"Fifti tu pesen apim bilong pe gavman i tok long las Palamen kibung long givim long ol wok manmeri i no kamap yet.

"Dispela mani i no olgeta 52 pesen tasol i kisim 5 pesen bilong ol yia stat long 2000 i kam inap long 2009 we gavman nau i bungim wantaim na i tok long givim.

"Na gavman bai hat long givim long wanem dispela bai bikpela mani.

"I bai isi sapos em i bin givim stret 5 pesen long wanwan yia taim em i bin tokaut long em," Mista Malabag i tok.

Em i tok gavman i bin save apim pe bilong ol wok manmeri long 5 pesen bihainim wok painim Hay Grup Konsalten i bin kamapim long 2000.

Tasol bihainim dispela rivi i bin kamap na dispela i no kisim wok bilong olgeta wok manmeri.

Wok rivi i bin kamap pe bilong ol hetman bilong ol dipatmen o oganaisesen.

"Mi askim gavman long bihainim tok em i mekim bipo long bikpela hevi i kamap," Malabag i tok.

PASCALLIS MICHAEL
'SIRIP' KODANA
Turned 1 Year today - 20th January, 2011

BIRTHDAY GREETINGS



HEY BATA STRET!!!!
ONE BIG CHEER FROM YOUR IROS TRIBE @ BOTTOM STREET - CRANE.
SPECIAL HUG FROM BATAS HUNTER TJANGAU & PAOLO SAKETE!

LAIKIM YU PLANTI NA GOD I KEN BLESIM YU.

BIRTHDAY GREETINGS



PASCALLIS MICHAEL
KODANA

1ST Birthday - 20th January, 2011

Greetings from
Kodanas, Atalous, Davanis and Coombes
Family in Moresby, Manus, Silanga and Brisbane.
Love na Kisses from Mum and Dad at Erima.
Bikpela tru i kam long pren bilong yu Terryanna long Rainbow.

OHE i mekim klia ol GPA

...Kisim inap tasol long Kwota na spes

Veronica Hatutasi i raitim

WANTAIM tupela wik tasol long nupela 2011 skul yia bai stat, planti papamama na ol skul pikinini i wok long redi nau long stretim ol samting long lukim olsem ol pikinini i statim gut skul bilong ol.

Tasol olsem yumi save gut yet, long dispela kain taim, planti papamama na ol pikinini bilong ol, moa yet, ol dispela bai go long ol yunivesiti na ol bikpela skul bihain long pinisim Gret 12, em i taim bilong hetpen.

Bihain long Opis bilong Haia Edukesen (OHE) i putim aut lista bilong ol Gret 12 sumatin i kisim ofa i go long ol yunivesiti na ol bikpela skul, planti papamama na ol

sumatin i no amamas long wanem, ol i tok ol pikinini i kisim ol gutpela mak, tasol ol i no kisim ofa long ol bikpela skul we ol i bin putim long skul long en.

Wantok i bin kisim ol toktok long bikman long OHE Skolasip seksen, Joseph Morimai, bilong mekim klia as long watpo sampela sumatin i mekim gut tasol ol i no kisim ofa long ol yunivesiti.

"Gret Poin Averej o GPA mak we ol Gret 12 sumatin i kisim na OHE i givim TESAS skolasip i go long ol em 2.25. Em kat of GPA mak bilong OHE yet na ol sumatin i kisim dispela mak em OHE i save givim skolasip i go long ol.

"Tasol wan wan yunivesiti na ol narapela bikpela kolis na skul i gat ol kwota sistem bilong ol yet long ol

wan wan skul olsem Saiens, Fisiks, Lengwisj na Literetsa we ol i skelim long mak na spes na kisim hamas sumatin long wanpela yia.

"Tok piksa em, sapos Ikonomiks na Bisnis skul long Yunivesiti bilong PNG i gat 15-pela spes tasol, ol bai kisim tasol ol sumatin i kisim gutpela na bikpela namba o mak pastaim. Na bai nogat spes moa long sampela ol narapela i kisim ol gutpela mak.

"Wankain tu long Yunivesiti bilong Teknoloji long Lae we ol Maining na Enjiniaring sumatin ol i kisim i mas gat GPA long mak bilong 3.5 i go antap.

"Ol institusen i mekim olsem inap tasol long manimak we gavman i givim long ol na spes long inapim kwota ol wan wan skul i gat long

em," Mista Morimai i tok.

Long las yia, moa long 13,000 sumatin long PNG i bin sindaun long 2010 Gret 12 tes. Na 10,015 i kam aninit long sponsasip bilong OHE TESAS Skolasip skim. Long 2009, samting olsem 9,000 sumatin i bin kam aninit long sponsasip bilong OHE Tesas Skolasip skim na dispela i min oilsem olgeta yia, OHE i wok long givim TESAS Skolasip long moa sumatin, tasol spes long ol yunivesiti i no inap long kisim olgeta sumatin husat i aplai o mekim gut. Dispela ol skolasip em OHE i givim long ol nupela sumatin na ol dispela i skruim skul bilong ol i go long Yia 2, 3, 4 na 5.

OHE i tromoim K32 milion long sapatim ol sumatin aninit long TESAS skim.

Mista Morimai i tok ol riplot long sampela Gret 12 sumatin long sampela skul i bin "cheat" o kopim ol ansa long tes bihain long ol i kisim ol tes ansa pepa long sampela lain em i samting bilong Mesamen Sevis Yunit (MSU) na i no OHE.

Pinis... Mista Morimai i tok em i no analaisim o glasim yet ol mak bilong ol Gret 12 sumatin we ol i ken skelim long painimaut wanem ol skul i bin wokim gut, wanem i nogat long ol kain "criteria" o mak bilong ol yet.

Em i tok ol yunivesiti na ol haia institusen i bin yusim tasol lista bilong MSU long kisim ol sumatin i go long ol yunivesiti institusen bilong ol.

Gavman lus tingting long Bogenvil - Akoitai I kam long pes 1

I kam long pes 1

"Long taim ABG i kamap long 2005, pawa o atorit bilong rijinel memba long go pas long gavman bilong ailan i no stap moa.

"Dispela nau i stap long han bilong presiden.

"Long taim ABG i gat presiden, em nau i hetman bilong gavman na ol manmeri bilong ailan.

"Gavman bilong Bogenvil i no wankain long gavman bilong ol arapela provins we aninit long Oganik Lo long Provinsel Gavman na Lokol Level Gavman, rijinel o gavana i gat atoriti long provins.

"Nogat. Long Bogenvil dispela nau i stap long han bilong presiden bilong ABG.

"Mi askim tupela lidaman long sindaun na stretim dispela ol toktok na maski long tok pait long pepa," Mista Akoitai i tok.

Em i tok ol manmeri long Bogenvil i kisim planti pen pinis na i no laik go bek long dispela ol taim.

Moa yet em i tok maski taim bilong holim referendum i kamap klostu, Bogenvil i no redi long mekim olsem.

Em i tok ailan i nogat strong long sanap bilong em yet.

"ABG i save gat daunbilo long K10 milion long revenu long wanwan yia na planti bilong dispela mani i kam long nesanel gavman.

"Sapos dispela i olsem em i nogat inap mani long lukautim em yet.

"Em i ken tok long holim referendum sapos em i kamapim moa long K30 milion o K50 milion," Akoitai i tok.

Wantaim dispela hevi, em i tok, nesanel gavman i asua tu long wanem em i no givim olgeta helpim long sait bilong mani olsem tok i stap long BPA.

"Mi no amamas long wok Bogenvil Afeas opis i mekim.

"Mi statim Bogenvil Afeas opis na nau wok i no kamap olsem em i mas kamap long em.

"Mi wari olsem opis bilong Bogenvil Afeas i wok long aiarim planti ol aia ka.

"I gat mak bilong mani wanwan ol minista o memba bilong Palamen i kisim long aiarim ol ka.

"Dispela i wankain tu long silip long hotel.

"Na sapos minista o memba oltaim i aiarim ka o silip long hotel long longpela taim, mipela laik save em i kisim mani we?

"Bikos mani i em gat i stap long hap taim tasol," Akoitai i tok.

Em i askim Ombudsmen Komisen long mekim wok painim long opis bilong Bogenvil Afeas na tokaut sapos opis i sevim ol manmeri olsem em i mas mekim.

Kamapim LOA pastaim bihain opim Panguna main

Paul Zuvani i raitim

NESENEL gavman na Atonomus Bogenvil Gavman (ABG) i mas rivuim Bogenvil Kopa Agri-men (BCA) bipo long ol i tok long opim Bogenvil kopa main gen.

Dispela i min kamapim len ona asosiesen (LOA) bilong ol papagraun pastaim.

Sam Akoitai, bipo memba bilong Sentral Bogenvil i tok long taim ol papagraun i wari long ol i no kisim gutpela helpim long main taim main i bin stap.

Em i tok Bogenvil kopa main i bikpela main long wol na nesanel gavman na ABG i mas tok klia long tok bilong ol.

Em i tok planti hevi i kamap long ol manmeri long Papua Ni-

ugini na ailan na i no gutpela ol i bungim gen dispela hevi.

Long dispela tupela gavman i mas toktok gut long tingting bilong ol.

"Mi bilip i gat sampela mani bilong main i stap tasol dispela gavman i no givim yet.

"Dispela mani sapos i givim bai helpim long kamapim gen Bogenvil," Mista Akoitai i tok.

I go moa long pes 4



DABOLIM ...or TRIPOLIM!

Baim K1 igo inap long K20 blo DABOLIM na K50 na K100 blo TRIPOLIM

Ringim Customer Care long 1555 or Emailim support@bemobile.com.pg
Kisim long olgeta topkads, Direct na ATM topup

bemobile mipela bilong yu
Terms and Conditions apply

Bai pinis long Saturday 22/01/11

Klinim ol skul eria bipo skul i stat

OLGETA skul long kantri i mas klin na redi bipo skul i stat long Februeri 7 we i stap tupela wik longwe tasol nau.

Taim Edukesen Sekreteri i tokaut long dispela, em i singaut long olgeta skul long kantri, ol kea teka long ol skul, ol prinsipel, ol het tisa, ol skul bot memba, ol menesmen, ol gavaning kaunsel, ol tisa, ol papa-

mama na ol gadien long mekim wok long klinim ol skul insait long tupela wik i kam bipo skul i stat.

Dokta Pagelio i tok long ol yia i go pinis, ol skul i save yusim namba wan wik bilong skul long klinim skul na ol i no save bisi tumas long mekim ol skul wok stret.

"Olsem na askim i go long ol kea teka long ol skul, ol prinsipel, ol het

tisa, ol skul bot memba, ol menesmen, ol gavaning kaunsel, ol tisa, ol papamama na ol gadien o was papamama long stretim ol yet na yusim tupela wik bilong malolo i stap yet long mekim wok long klinim ol skul graun, ol klasrum, ol laibreri na ol opis," Dokta Pagelio i tok.

"Bikpela samting em ol sumatin i mas go bek long skul, ol klasrum na

ol skul graun i klin na redi long ol skul lesen i stat long namba wan de bilong skul, em Mande Februeri 7, 2011," Dokta Pagelio i tok.

Em i tok edukesen bilong ol pikinini i bikpela samting na olsem, olgeta skul long kantri i mas harim dispela toksave na bihainim long klinim ol skul graun nau.

Kamapim LOA pastaim bihain opim Panguna main

I kam long pes 3

Em i tok dispela mani bai kam aninit long Bogenvil Kopa Agrimen.

Agrimen i stap namel long nesenel gavman na Bogenvil Kopa kampani.

Tasol em i tok ol papagraun i no stap long dispela tok orait.

Em i tok taim em bin stap maininig ministra em i salim pepa i go long Nesenel Eksekutiv Kaunsel long kisim ol manmeri o grup husat i no stap insait long tok orait long go insait.

Na dispela ol grup em provinsel gavman na ol papagraun.

Em i tok nau olsem ol toktok bilong opim gen Bogenvil kopa main i kamap, toktok bilong kisim provinsel gavman na ol papagraun i no stap.

"Tude em i narapela kain long bipo. Mipela i mas bungim olgeta grup husat i pas long kamap o stap bilong maining, wel o ges projek.

"Long Bogenvil dispela i min gavman na kampani i mas mekim rivi long BCA na putim ol papagraun long ol toktok bilong Bogenvil Kopa Agrimen bipo long ol i toktok long opim gen main.

"Bikos long dispela ol toktok na hevi long Bogenvil i kamap," Akoitai i tok.

Polis abrus na paiarim gan

Bustin Anzu i raitim

POLIS long Lae klostu kamapim birua long pablik taim ol i abrus na pairapim gan insait long opis, we bihain, i kamaut na brukim wol bilong wanpela benk klostu.

Dispela hevi i bin kamap long dispela wik Mande.

Lae siti polis bos Sif Supritenden Nema Mondiai, i tok polisman i no save olsem wanpela katris i pas na i stap insait long masin yet na kirap nogut na em i pairapim gan.

Dispela katres i go na brukim sait bilong Benk bilong Saut Pasifik (BSP) na abrusim tupela wokmeri insait. Sem taim tu katres i abrusim sampela meri husat i sindaun long outsait bilong dispela windo tu.

Na ol kastoma bilong benk i pret nogut tru na ol i ting olsem raskol i laik hensapim benk na ol i slip na

pundaun insait long benk.

Na insait long opis bilong polis yet, klostu wanpela sinia polis man i lusim han bilong en tu.

Mondiaia i tok polisman i no save olsem wanpela katres i stap yet long samba bilong gan.

Provinsel Polis Komanda bilong Morobe, Sif Supritenden Peter Guinness i tok we bilong rausim o sekim katres long samba em mas kamap long ples we i nogat man long en na ples i mas stap klia olgeta.

Em i tok sefti em i wanpela bikpela samting we ol polis mas was gut long en bikos wok wantaim gan em samting bilong kilim manmeri i dai na ol i mas tingim sefti pastaim.

Wantok Niuspepa i bilip ol lain long BSP benk i putim komplek pinis long ol i mas karim wok painimaut long dispela hevi we i bin kamap.

Polis i kisim kompyuta

Bustin Anzu i raitim

PROSEKUSEN seksen bilong polis long Lae nau bai traim long stretim ol kot pepa hariap tru na long taim.

Planti taim i save gat problem long ol samting bilong wok. Na dispela i save pulim wok bilong ol i go long we tru na i no long taim. Sampela taim dispela i save mekim na ol kot i save rausim ol trabel man o meri i go fri long kot.

Kain liklik samting olsem kompyuta, pepa na ol narapela samting i ken mekim bikpela wok. Planti taim ol i lus tingting long dispela na i

ken kisim longpela taim long stretim dispela.

Prosekusen seksen bilong polis i kisim taim long stretim ol kot pepa long wanem i nogat kompyuta long mekim wok. Na dispela tingting bilong ol long painim wanpela, em narapela dipatmen long mekim wok bilong loa na oda i kisim dispela bagarap.

Long las wik, PNG Kastoms i givim wanpela kompyuta long Noten Rijen, Francis Nupuru i tok ol i amamas long givim dispela nupela kompyuta i go long ol prosekuta long mekim kot wok i isi na ol kes bilong ol i ken go hariap long kot.

Em i tok ol i gat gutpela wok bung wantaim i stap long daunim ol hevi bilong loa na oda.

"Mipela i amamas long wok bung wantaim polis. I no long Lae tasol long olgeta hap we mipela i gat opis long en. Mipela i gat bikpela wok long mekim na em long wok bung wantaim polis na helpim i go kam long mekim wok," em i tok.

Nupuru wantaim Sibabel Kobua, Dairekta bilong Trade na Komplaiens (Trade & Compliance) bilong noten rijen i bin soim pes long Lae polis stesin wantaim dispela nupela kompyuta.

Nupuru i tok polis em ol namba wan lain husat i save go pas long wok bilong loa na oda tasol ol manmeri i mas noken lus tingting olsem i gat narapela lain tu i stap insait long loa enfosmen ejensi, olsem Maigresen (Migration), Leba (Labour), NAQIA, Nesenel Piseris Atoriti (NFA), Helt (Health) na Kastoms (Customs).

Nupuru i tok long ol yia i kam, planti tok bilong ol em Lae Prosekusen i bin givim gut long kot na ol i kisim ol gutpela bekim o mekim save long ol trabel man o meri. Na dispela em i wok bilong tupela sait wantaim.

Lae siti polis bos Sif Supritenden Nema Mondiai i tok amamas long dispela gutpela helpim bilong Kastoms long wanem kain masin olsem bai mekim wok bilong ol i isi.

Em i tok dispela em long gutpela wok bung bilong ol wantaim Kastoms.

Em i tok long nau yet i mas i gat gutpela wok bung namel long olgeta lo enfosmen ejensi ol mas skelim save, wok na tu ol risos bilong ol long daunim hevi bilong loa na oda insait long kantri.

Dispela kompyuta em namba tu we polis long Lae i bin kisim.

Long tupela wik i go pinis, Daltron, wanpela kompyuta kampani long Lae i givim i go long ol CID Frod Skwat long mekim wok bilong ol i isi.

Wok long Lae rot i no yet, na kampani kisim mani pinis

Bustin Anzu i raitim

OL ROT long Lae siti i no stat yet maski ol i kisim ol dispela ol kampani i kisim mani pinis long wokim ol rot.

Morobe Gavana, Luther Wenge i no amamas tumas long dispela na toksave long ol kampani mas mekim o stretim ol rot hariap tasol.

Ol dispela 4-pela kam-

pani em R & Sons Konstraksen, Shorncliffe PNGLtd, FTM Konstraksen na Cameron Konstraksen Ltd.

Wenge i tok ol i kisim dispela ol sek mani tripela wiki go pinis tasol nau yet i nogat sampela sain bilong stretim ol rot insait long siti na em i wari.

R & Sons i kisim kontrak long stretim dispela 1.4 kilomita rot namel long Bugandi na Sneek Ba long mani mak bilong K9 milien na Shorncliffe bai stretim 1.2 kilomita rot namel long raunabout bilong Angau Hausik na i go long taun na stop long Tusa Praivet haus sik.

FTM i kisim tok orait long wokim 1.1 kilomita rot long raunabout long faia stesin na i go long raunabout long St Mary's Praimeri skul na Cameron Konstraksen i kisim wok long stretim olgeta 1.3 kilomita han rot long Top Taun.

Tasol ol dispela kampani husat bai wokim rot i tok i gat

sampela liklik pepa wok bilong stretim ol dispela rot i no go stret yet. Taim ol dispela samting em ol i stretim, em bai ol i statim ol dispela wok.

Shorncliffe i tok ol bai stretim ol sampela rot bilong Top taun tasol planti bilong ol dispela rot em ol i no disainim gut long kamapim rot olsem bai ol i wokim gen. Na tu, dispela hap eria em i bisi nogut tru na tu ol narapela kampani i wokim ol rot i stap na ol i no laik long bagarapim wok bilong ol.

Cameron i tok ol saveman bilong ol long mekim simen bai kam long Australia olsem na ol i wet.

R & Sons i bin kisim K9 milien, Shorncliffe i kisim K9.8, FTM i holim K9.1 milien na Cameron i poketim K9.8 milien.

Dispela ol mani em Ekting Praim Minista Sam Abal i bin givim ol long Disemba 27 long Lae Intanesenel Hotel olsem wanpela kris-mas presen bilong Lae siti.

PLES BAGARAP: Ol wokman i stretim gutpela Masin Gan nambis long Madang taun we i bagarap bikos long hevi bilong klaimet senis. Poto: FAIL



Hevi bilong klaimet senis

PLANTI hap bilong wol nau i bungim hevi bilong klaimet olsem bikpela ren, hat bilong san, guria na solap bilong solwara. Long las wik mipela i harim nius bilong bikpela ren i kamap long wanpela hap bilong Australia olsem Kwinslen na Vikoria.

Na long narapela hap bilong Australia olsem Westen i bin gat bikpela paia na i bagarapim haus bilong planti manmeri wankain olsem tait i baragapim haus bilong ol manmeri long Kwinslen na Vikoria.

Ol Loa bilong Laip



OL GUTPELA loa bilong laip i hangamap long loa bilong God!

Yumi nidim loa bai kantri i ken ron gut na manmeri i ken sindaun gut na bel isi wantaim.

Moses i tokim ol lain Israel long bihainim loa bilong God:

5: Mi skulim yupela pinis long loa olsem God, bikpela bilong yumi i bin tokim mi.

6: Yupela i mas bihainim tru ol dispela loa, bai ol pipel bilong ol narapela kantri i ken save olsem, yupela i gat gutpela tingting na planti save" (Deut 4:5-6)

Jisas yet i tok, gutpela sindaun hia long graun, na long bihainim tu i hangamap long loa bilong trupela laik (Love) pasin.

Olsem wanem yumi gat ol Loa?

Loa i stap! Loa i stap bai ol man i bihainim. Yumi nidim ol loa bilong was long kantri na sindaun bilong yumi. Loa i stap bilong lukautim laip bilong wanwan man, meri na pikinini na komyuniti wantaim; bai ol i gat sekyuriti na jastais na rot bilong stretim kros o wari na sindaun gut wantaim na mekim gutpela pasin.

Loa i stap bilong kontrolim man na sapotim ol gutpela samting man i laikim:

- Loa i stap bilong kontrolim laip bilong man. Nogut sampela man i paul na mekim pasin nogut long narapela na bagarapim komyuniti na kantri wantaim
- Loa i stap bilong respektim na givim spes long arapela;
- Loa i stap bilong sapotim na lukautim famili laip;
- Loa i stap bilong was long ol rait bilong man, meri na ol pikinini;
- Loa i stap bilong tokaut stret long wanem samting i gutpela na wanem samting i nogut.

Wanpela we bilong skelim komyuniti o kantri em bilong askim: "Ol man i save bihainim ol loa o nogat?" Sapos nogat, bai i gat Loa & Oda hevi!

Wanpela Minista bilong Jastis i bin tok olsem long kantri bilong yum; "PNG i gat olgeta loa i stap, tasol planti man i no save bihainim. Ating PNG i pulap nau long ol bikhet man. Olsem na yumi gat wari long Loa na Oda!

I gat kankain Loa i kamap long kain kain hap:

- I gat loa i karamapim ol manmeri bilong graun, olsem God i wokim ol;
- I gat Loa bilong ples;
- I gat ol loa bilong Gavman.

Ol dispela kain loa, sapos ol i gutpela na stret, i ken bung wantaim na lukautim gut na strongim laip bilong ol pipel. Tasol sampela taim man i laik senisim loa o pilai nabaut long loa, o tanim as tok bilong loa long laik bilong ol yet. Man tu i ken wokim nu-

pela loa nogut i no helpim ol pipel na kantri. i gat planti ol gridi man i stap i laik givm baksait long Mama Loa bilong kantri, ol kastam loa bilong ples na Loa bilong God tu wantaim. Ol i laik bihainim laik bilong ol yet tasol. Dispela kain man i save paulim kantri na mekim birua pasin lonf ol pipel. Olsem na yumi mas was gut long ol nupela loa, o senis long loa ol i laik kamapim long Haus Palamen o long ples. Nogut loa i krangi na givim hevi long ol pipel. Nupela loa i ken gutpela sapos loa i wanbel wantaim Loa bilong God na pasin tru bilong man olsem God i wokim man.

Loa i kamapim olgeta tingting na laik bilong man em loa bilong trupela laik. Dispela loa i respektim laip bilong wanwan man, meri na pikinini na i nogat rong pasin o sin insait long en.

Ol manmeri i wokim ol Loa: Husat man i wokim loa, em mas nambawan man bilong bihainim dispela loa!

God yet i wokim loa bilong trupela laik. Na God yet i nambawan long bihainim loa bilong em yet; God yet em trupela laik.

Mama loa em bilong yumi ol PNG, na yumi mas respektim na bihainim. Loa bilong Palamen i wokim – ol Politisen i mas nambawan long bihainim! Loa bilong ples em bilong olgeta i bihainim.

Santu Paul i tok: "Man i givim bel bilong em long narapela man em i bihainim tru loa". (Rom 13:8)

Tasol tingting bilong sampela man i krangi. Ol i ting ol yet i wokim lo na narapela man i mas bihainim na ol nogat! Sampela Palamen i wokim lo – nau ol Memba mas bihainim dispela loa pastaim; ol Jastis Dipatmen mas bihainim dispela loa long ol kot; ol pablik sevan mas bihainim dispela loa long mekim wok bilong ol; ol manmeri bilong kantri mas bihainim dispela lo. Em loa bilong yumi olgeta nau! i nogut, sapos i gat wanpela loa long maniman na narapela long tarangu, o wanpela bilong bikman na narapela bilong grasrut. Sapos loa i sapotim wanpela lain na i givim hevi long narapela – loa i krangi na i nogut olgeta! Kain loa olsem i sapotim korapsen.

Sam 19:8 – 11

"Loa bilong God i nambawan tru, na i givim gutpela save long yumi..Bikpela i save tokim yumi long olgeta pasin yumi mas mekim na dispela tok i tru na i stret olgeta.

Tok bilong bikpela i winim gol. Loa bilong bikpela i swit tumas na i winim hani.

Loa bilong yu (God) i givim save long mi, wokman bilong yu.

Mi bihainim loa bilong yu, olsem nay u save mekim sindaun bilong mi gutpela tru".

Yumi nidim loa bai kantri i ken run gut na manmeri i ken sin-

Spakbrus na gan hevi kamap strong long Bogenvil

Veronica Hatutasi i raitim

HEVI bilong spakbrus na gan em tupela hevi we i stap bikpela nau long Otonomes Rijen Bogenvil (ARB), bosman bilong ol polis long ARB, Thomas Eluh i tok.

Taim ol polis i traim long mekim samting long daunim dispela hevi, Mista Eluh i singaut long ol yangpela manmeri na ol pipel long long senisim pasin bilong ol na wok bung wantaim long stre-

tim Bogenvil na go hetim ol wok developmen long ailan.

Long wankain taim, Mista Eluh i tok em i moabeta long gavman, ol sios na ol non gavman ogenaísesen o sivil so-saiti long ARB i wok bung wantaim long kari-maut ol awenes wok long stopim ol yangpela i kisim spakbrus bikos dispela i kamapim bagarap long ol yet, komyuniti na rijen.

"Polis i wok isi isi tasol i gat nid long painim as stret bilong hevi. i moa-

beta long gavman, ol sios na ol non gavman ogenaísesen long ARB i wok bung wantaim long karimaut ol awenes na ol i ken etresim hevi bilong spakbrus i stap long olgeta hap bilong rijen," Mista Eluh i tok.

Mista Eluh i tok long dispela taim, i nogat meknais long sait bilong lo na oda na ailan na pipel i stap isi.

Wakunai em ples long Bogenvil we spakbrus i save gro gut na ol yangpela bilong ol narapela hap bilong ailan i save

kisim dispela spakbrus long hap.

Long sait bilong gan, Mista Eluh i tok planti ol kain gan em ol man holim long olgeta hap bilong ailan, tasol i moa yet long sentrel na saut Bogenvil.

Em i tok planti ol strongpela gan i stap insait long komyuniti na i moabeta long pipel i givim bek ol dispela gan long han bilong ol atoriti na laip long rijen i ken go gut.

Bogenvil pipel i mas senisim pasin

Veronica Hatutasi i raitim

PIPEL long Bogenvil yet i mas senisim pasin na ol bain lukim ol gutpela senis na wok kamap i kamap long rijen, bos bilong ol polis long Otonomes Rijen bilong Bogenvil em Thomas Eluh, i tok.

Mista Eluh husat i wok olsem bosman bilong ol polis long Bogenvil long 7-pela mun nau i tok planti gutpela senis i wok long kamap long olgeta hap bilong Bogenvil, tasol pipel i mas

senisim sampela pasin bilong ol.

"I gat planti sans long ol wok bisnis i kamap long Bogenvil long dispela taim. Planti bisnis long sait bilong kopra, kakau na pis i stap. Tasol pipel i mas senisim pasin na tingting long wok bung long mekim ples i kamap orait na ol wok developmen na gutpela sindaun i ken kamap.

"Sampela ol samting we i soim olsem Bogenvil i gutpela ples long stap we pipel i luksave olsem lo i bikpela samting em

long taim bilong Bogenvil ileksen we nogat asua, trabel na hevi i bin kamap. Bogenvil i bin soim wol olsem demokrasi i stap.

"Tasol pipel na moa yet ol yangpela i mas lusim hombru, spakbrus na ol gan na bai rijen i lukim gutpela senis na ol wok kamap.

"Olgeta manmeri na pikinini long Bogenvil i gat wok long daunim na stretim ol hevi long rijen na i no ol ausait lain, gavman o polis," Mista Eluh i tok.



GIVIM HELPIM: Mista Minja i wok long givimaut ol kaikai long ol lain i kisim bagarap long haiwara long Laloki, Bomana na 12 mail. Dispela wok halivim i kam long Nesesnel Kapital Distrik Komisn na Gavana bilong NCD, Hon Powes Parkop. *Poto: NCDC Media Yunit*



Planti no save yet long rit na rait

Andrew Molen i raitim

planti manmeri long Papua Niugini save yet long rit na rait.

ol tu i no senis.

WANPELA nupela sios long Papua Niugini tok olsem nogat

Long dispela as, planti samting long laip na sindaun bilong

Saientoloji (Scientology) sios i tok edukesen em i wanpela bikpela hevi bilong PNG yet.

2009 ripot bilong "United Nations Development Program" (UNDP) i putim PNG long namba 159 ples namel long 180 kantri.

Long Mas, 2010, ripot bilong US Department of State i soim olsem mak bilong ol manmeri long PNG husat i save long rit na rait em 49.3 pesen (%) tasol.

Dispela em i aninit long hap namba bilong populesen bilong PNG.

"Namel long 5-pela skul mangi, wanpela tasol i save go long sekenderi skul.


"Edukesen long PNG em i no fri na i nogat lo i tok olgeta i mas go long skul olsem na i luk olsem ol samting bai no inap senis hariap long hia," Dairekta bilong Saientoloji Voluntia Ministas (SVM) long Pasifik, Mathew Andrews i tok long wanpela stetmen pepa.

"Nogat wanpela samting i save stap wankain, em i save senis long kamap gutpela o i save bagarap moa yet," Andrews i tok.

Andrews i bin raun i go long Madang na Is Sepik provins long las 4-pela mun wantaim ol wokmanmeri bilong em we em i bung wantaim ol manmeri long hap na givim skul long ol long kain kain het tok.

Wanpela bilong ol dispela het tok em "Technology of Study" we i skulim ol manmeri long ol rot bilong lainim samting.

"I nogat samting i pasim tingting bilong ol long lainim samting, nogat man i skulim long ol tasol long ol rot bilong lainim samting.



GO HAPSAIT:
Mista Andrews (go pas) i kalapim mambu bris long ples Garik long Madang taim ol i go mekim sampela wok long hap long 2010.
POTO: SVM.

"Dispela kain skul i ken helpim ol," Andrews i tok.

Mista Andrews wantaim ol minista bilong em i wok long kisim dispela trening i go long ol ples long las 7-pela mun we planti manmeri amamas long bungim ol.

Saientoloji em i wanpela sios we i save skulim ol manmeri long ol kain wok na bilip long pasin na rot we ol samting i kamap na i ken bihainim long ron gut.

Sampela ol arapela sios long PNG i no amamas long harim dispela sios i kam tasol Mista Andrews i tok ol i no kam long rausim ol manmeri long sios bilong ol tasol long helpim sindaun bilong ol tasol wantaim ol skul progrem bilong ol insait long komyuniti.

Pasifik tua bilong SVM is go bek nau tasol i gat ol wokmanmeri bilong ol i stap long wok insait long ol komyuniti.

DON'T FORGET THE GOLDEN RULE!

WHEN ITS...
BACK TO SCHOOL

ITS ALWAYS...
BACK TO THEODIST!

CALL OUR SALES TEAM TODAY!

Walgani Drive, Port Moresby Ph: 325 6500 Fax: 325 0302 Email: sales@theodist.com.pg
Milfordhaven Road, Lae City Ph: 472 5488 Fax: 472 7838 Email: saleslae@theodist.com.pg

THEODIST LTD

OLsik manmeri long siti bai go long ol eben klinik ... Autpesen long PomGen i pas

**Veronica Hatutasi
i raitim**

Fail Feks:

- Autpesens seksen long Pot Mosbi Jenerel haus sik i pas;
 - Ol siklain mas go long ol eben klinik klostu long ol;
 - Haus sik Dispenseri bilong kisim marasin i pas;
 - Ol siklain mas baim ol marasin long ol famasi o kemis long siti;
 - Yusim klinik bilong ol pikinini seksen long Eksiden na Imejensi sevis;
 - Klinik bilong ol pikinini i stap op yet long sem hap.
- OL SIK manmeri na pikinini long Mosbi siti nau bai go long ol eben klinik insait long siti.
- Dispela em bikos autpesens seksen long bikipela haus sik long siti, em Pot Mosbi Jenerel Haus sik, i pas.
- Ol toktok i kam long

opis bilong Sif Eksekutiv Opis bilong Pot Mosbi Jenerel Haus sik i tok bikipela wok i kamap long stretim Eksiden na Imejensi seksen bilong haus sik na olsem sampela sevis eria long haus sik i pas nau na sampela ol i surukim I go long nara-pela hap bilong haus sik.

Long nau, autpesen dipatmen i pas na ol haus sik atoriti i putim toksave long ol sik manmeri igo long ol eben klinik long siti.

Dispenseri o ples we ol i save kisim marasin i pas na ol haus sik atoriti i putim toksave long ol siklain i mas go baim marasin long ol famasi. Dispenseri na famasi i stap klostu long eria we ol i karimaut ol wok stretim long eksiden na imejensi seksen em ol i pasim long Krismas taim. Na i nogat save yet wanem taim ol dispela wok long stretim

"Ol wok long stretim Eksiden na Imejensi seksen i bin stat long namel

bilong las yia na wok i go het yet. Olsem na ol i pasim na surukim ol sampela sevis eria we istap klostu long hap ol i karimaut wok long em. Wanpela kontrekta i karimaut ol wok stretim. I no liklik wok tasol i bikipela wok long stretim na mekim bikipela dispela Eksiden na Imejensi eria," opis bilong CEO i tok.

Opis i no givim nem bilong kontrakta i mekim ol wok, manimak kontrakta i kisim long karimaut ol wok na wanem taim dispela wok bai pinis.

I moabeta long siti na ol setelmen husat i save kisim helt sevis long Pot Mosbi Jenerel Haus sik olsem autpesen seksen i pas na ol i mas go nau long ol eben klinik klostu long ol. Na tu, nogat ples bilong kisim marasin fri bikos haus sik dispenseri ipas na olsem, taim ol i sik, I moabeta ol i baim ol marasin long ol famasi.



TENKYU: Maun Hagen Asbisop Douglas Young, SVD, i sainim ol pepa bipo long senta i kisim mani long progrem. Lukluk i stap em PNGSDP CSI menesa, Lawrence Stephens.

PNGSDP sapatim Koibuka Sab Helth Senta long WHP

**Richard Kelebi (PNGSDP)
i raitim**

PAPUA Niugini Sastenabel Developmen Progrem Ltd (PNGSDP) liklik taim bai givim helpim long mani mak bilong K250,000 long kamapim wod bilong ol mama na ol wok manmeri bilong Koibuka Sab-Helt Senta long Westen Hailans Provins.

Tok orait bilong dispela helpim i bin kamap namel long PNGSDP na Maun Hagen Katolik Helt Sevises.

Mani mak bilong dispela projek

i stap long K320,000.

PNGSDP bai givim K250,000; Katolik Daioses bilong Maun Hagen bai givim K20,000 na Koibuka Sab Helt Senta bai givim olsem K50,000.

Koibuka Sab Helt Senta i stap long Loua Nebilyer long Tambul/Nebilyer Ilektoret long Westen Hailans Provins. Em i gat olsem 20,000 manmeri long dispela ples.

I gat lukluk olsem dispela projek bai kisim olsem 7-pela mun long pinisim.

As tingting bilong dispela pro-

jek i bilong strongim helt progrem bilong ol mama na pikinini na stap bilong ol wok manmeri.

Lawrence Stephens, PNGSDP menesa bilong Komyuniti na Sosel Invesmen (CSI) i tok kampani i amamas long givim sapat long kain bikipela sevis bilong komyuniti.

"Em i gutpela samting long wanpela i pas long ol wok we i gat bikipela mining long komyuniti.

"Na olsem PNGSDP i amamas long givim helpim," Mista Stephens i tok.



P A P I N D O

GROUP OF COMPANIES

Congratulate

The Provincial Government
and people of East Sepik Province
on the Grand Opening of the
Wewak Town Market

Wewak Jetty

Wewak Police Station

**GRAND
OPENING
20th January
2011**



Edukesen Ekspo i ken helpim gut ol skul

Veronica Hatutasi i raitim

HOLIM Edukesen Ekspo em i wanpela rot i helpim kamapim ol sumatin i save long wanem samting ol bai mekim taim ol i pinisim sekonderi o nesanel hai skul bilong ol na tu, ol bai wok hat na kisim ol gutpela mak long go long ol bikpela skul.

Bikman bilong Skolasip Seksen wantaim Opis bilong Haia Edukesen (OHE), Joseph Morimai i tok.

Em i tok wanpela klia piksa em Enga provins, we ol lida bilong em i putim bikpela wok, mani na tingting long edukesen o skul bilong ol yangpela pipel bilong em.

Mista Morimai i tok insait long las tripela yia nau, Enga provins i wok long holim Edukesen Ekspo na singautim ol yunivesiti na ol bikpela institusen long kantri long go toktok wantaim ol sumatin. Tu, ol institusen i mekim klia wanem ol kain kos ol i ofaim, wanem rikwaiamen o mak level ol bai kisim long go

long ol yunivesiti na ol institusen na bekim ol narapela askim bilong ol sumatin na ol tisa.

“Ol skul long Enga i putim bikpela wok, taim na mani long ekspo na ol i save askim ol yunivesiti na ol narapela institusen na ol bisnis skul long go na tok tok long ol sumatin. Dispela i save givim gutpela na klia piksa

i go long ol sumatin na tu, strongim tingting bilong ol long klia gut wanem samting ol bai skul long en na ol i wok hat tu long go long ol bikpela skul,” Mista Morimai i tok.

Insait long las tripela yia, Edukesen Ekspo long Enga provins i save ron long wanpela wik.



KILAKILA SEKONDERI BUNGIM OL BIKMAN: Ol sumatin bilong Kilakila Sekonderi skul long Nesanel Kapitel Distrik i welkamim Edukesen Minista, James Marape, na ol narapela bikman long Edukesen Dipatmen long wanpela wokabaut bilong ol i go long skul las yia. *Fail Poto*

Mesamen Yunit save glasim na skelim ol tes pepa na sumatin lista

Veronica Hatutasi i raitim

MESAMEN Sevis Yunit (MSU) bilong Edukesen Dipatmen em dispela bodi we i save sekim na redim ol mak bilong ol sumatin long skul bilong kantri bipo em i givim lista i go long Opis bilong Haia Edukesen (OHE).

I gat planti toktok i kamap olsem sampela Gret 12 sumatin long sampela skul long kantri i bin “cheat” o wokim stil pasin long kopim ol ansa we ol bin kisim long ansa sit long sampela lain long taim ol bin wokim fainol tes bilong ol long las yia.

Stat yet long taim lista bilong OHE i kamaut tupela wik i go pinis, planti sumatin na ol papamama i no amamas olsem maski ol pikinini bilong ol i kisim ol gutpela mak, ol i no kisim spes long ol yunivesiti. Na ol i tromoim ol sut toktok i go long OHE long ol pikinini bilong ol i no kisim spes long ol bikpela skul.

Tasol Skolasip opis bilong OHE i tok opis bilong ol i save kisim lista i gat nem bilong ol sumatin na ol mak we ol MSU i redim pinis na givim i go long ol tasol.

Na dispela lista em ol yunivesiti, ol tisa na nening kolis, ol teknikel na bisnis kolis na ol narapela bikpela skul i save yusim long kisim ol sumatin we mak bilong ol inap long go insait long ol yunivesiti na ol institusen bilong ol.

Lukim dispela piksa we OHE i olsem papa bilong maket bilding na MSU i olsem man i go salim ol samting long maket. Na ol yunivesiti na ol narapela teseri institusen i olsem ol man i go baim ol samting.

Tasol ol man long baim ol samting bai glasim gut ol samting na ol prais na baim inap long mak ol i ken baim na ol i gat spes long putim ol na karim i go long haus.

Wantok i traim long kisim ol kliapela toktok long planti ripot i kamap olsem ol Gret 12 sumatin long sampela skul long kantri i bin “cheat” o stil o sampela lain i givim ol tes ansa pepa na ol i lainim ol ansa na raitim ol long taim bilong eksam, tasol em ino bin inap.

Ol tokwin i tok 8-pela skul long Hailans rijen na Nesanel Kapitel Distrik i bin wokim dispela “cheat” o stilim ol ansa pasin.

Edukesen Dipatmen sekim Gret 12 tes asua

EDUKESAN Dipatmen i kari-maut ol wok painim olsem sampela Gret 12 sumatin long sampela skul long kantri i bin “cheat” o kopim ol ansa bihain long stilim ol tes ansa pepa. ong fainol eksam o tes bilong ol.

Edukesen Sekreteri, Dokta Joseph Pagelio, taim em i wokim dispela toktok long dispela wik i bin tok insait long tupela wik nau, midia i wok long putim auto i ripot long “cheat” pasin long Gret 12 nesanel eksam las yia.

Em i tok ol papamama, ol het tisa na ol tisa husat i bin makim ol tes pepa i wokim ol toktok long dispela pasin bilong sampela sumatin logn sampela skul i stilim ol ansa

na kopim long taim bilong fainol eksam bilon g ol.

Dokta Pagelio i tok Mesamen Sevis Yunit (MSU) i bin kisim 440 tisa long makim ol ansa tes pepa bilong 113,000 Gret 12 Gret 12 sumatin bilong las yia long 9-pela subjek. Em long Lenguj na Literetsa, Mets A, Mets B, Baioloji, Kimistri, Fisiks, Ikonomiks, Jiografi na Histori.

“Ol lain i makim ol ansa tes pepa i bin lukim ol wankain ansa long ansa sit bilong Baioloji na Kimistri long tripela skul na long Fisiks long wanpela skul. Taim ol lain i makim ol tes pepa i lukim dispela, ol bin stop long sekim ol na tok ol sumatin long ol dispela 4-pela skul i

bin “cheat” long ol tripela subjek.

“Ol bin go het long makim ol tes pepa long sem wik na ol analis o lain i save glasim ol dispela kain asua i ken mekim ol wok painimaut na tok sapos ol em i tru ol sumatin long 4-pela skul i “cheat”, Dokta Pagelio i tok.

Bihain ol i bungim ol data o ansa na glasim na sekim, ol analis o lain i wokim sekim i no bin lukim bikpela asua long tok olsem olgeta sumatin long ol 4-pela skul i bin gat wankain ansa long olgeta kwesten.

Dokta Pagelio i tok liklik lain sumatin i bin mas “cheat” long wanem, ol ansa bilong ol i wankain.

Na em i tok bikos taim i sot long makim ol sumatin i go long ol yunivesiti na ol haia institusen o ol bikpela skul na ol narapela wok i sut long makim, ol bin putim ol mak wantaim na ol i no mekim samting long ol lain we ol i lukim olsem ol i “cheat”.

“Baioloji na Kimistri o Fisiks tasol em ol subjek we dispela “cheat” asua i kamap long en. Tasol sapos sumatin i kisim gutpela mak stret long wanpela bilong ol dispela subjek, ol i no inap kisim em i go long yunivesiti bikos em i mas mekim gut tu long ol narapela subjek olsem Lenguj na Literetsa na Mets, we i bikpela subjek tu,” Dokta Pagelio i tok.

Kristen Yuniti pre bung long dispela wik

LONG TUDE, ol Kristen Sios long wol i wok bung wantaim long kamapim strongpela Kristen yuniti.

Dispela I wok long kamap long nesene na intanesene level.

Long dispela wik, wanpela grup bilong Katolik na Lutheran Sios long kantri Finlen i stap long Vatiken long bungim hetman bilong Katokim Sios long wol, em Pop, na strongim wok pren namel long tupela sios.

Dispela bung i save kamap olgeta yia na i pondaun long wik we ol Kristen Sios long wol i holim prea taim long wanpela wik bilong luksave long Kristen yuniti. Long dispela yia, Kristen yuniti prea wik i bin stat long Tunde na bai pinis long neks wik Tunde yet.

Dispela Finlen Lutheran na Katolik Sios grup i kam tu long Vatiken long selebretim pestode bilong was santu bilong Finlen, em Santu Henrik.

“Long olgeta yia,” Pop Benedict i toktok long tokples Gemani na tok, “dispela bung i mekim kamap long ples klia pren pasin na wok bung i stap namel long ol Lutheran an Katolik na tu, namel long ol Kristen long kantri bilong yupela.”

Pop Benedict 16 taim em i toktok long Kristen yuniti i tok olsem tru, gol bilong eku-menikol muvmen, em long “yuniti long bilip” i mas kamap, ol i no inapim yet. Tasol em I kamapim sampela poin ol i wanbel long ol. Wanpela em long Join Dekleresen long Doktrin o Bilip bilong Jastifikesen we ol i bin sainim long yia 1999.

Pop i tok ol bai glasim dispela het tok na antap long ol narapela samting, ol bai lukluk long kirapim wanpela “episkopo” opis.

Pop Benedict 16 i bin tok rot bilong ol sios i wok bung wantaim long sampela wei i ken kamap hatpela na i gat salens long en.

Wanpela Kristen lida grup long Jerusalem i redim ol prea bilong Kristen Yuniti Prea wik.

Ol prea i askim ol Kristen long tingim ol namba wan Kristen komyuniti long hap, sios long Jerusalem aste, tude na tumora.

Pop Benedict i tok ol sios long Jerusalem tude i soim yumi long mining bilong sanap strong namel long ol hevi na wok long kisim Kristen yuniti.

Dispela em i 25 yia bihain long nau I dai Pop John Paul 2 i bin statim Prea Wik bilong Kristen yuniti long 1986 bilong ol Kristen sios i bung na pre long belgut na bel isi long Asisi, Frans.

Katolik Sios bai santuim Pop John Paul

Nius i kam long Zenit Nius Ejensi, Vatiken

KATOLIK Sios klostu tam bai santuim nau i dai biknem sios lida long wol we planti ol sios na Kristen pipel pipel i save long en na i laikim, em Pop John Paul 2.

Divain Mesi (Divine Mercy) Sande Mei 11 em dispela de we seremoni bilong mekim Pop John Paul 2 i wanpela santu man long rot bilong kisim luksave long kamap santu bai kamap long em Vatiken yet. Bihain ol i santuim em, bai ol i kolim em long Bleset.

Em i no kisim longpela taim long santuim Pop John Paul 2 bikos long santu laip na wok bilong em taim em i stap laip na tu, taim em i lusim dispela graun pinis.

Hetman bilong Katolik Sios long wol. Pop Benedict 16, i tokaut long dispela nius long dispela wik.

Long wanpela pas i kam long kongrikesen i save glasim ol lain long kamap ol santu manmeri i tok Pop Benedict 16 wantaim prifek o lida bilong kongrikesen i tok oraitim ol pepa na ol samting i sut long mirakel we i oraitim wanpela meri taim ol dokta i no bin inap long oraitim em wantaim marasin. Tasol a bilong em i go long nau i dai Pop John Paul 2 long helpim na stretim sik bilong em i bin



SANTU PAPA: Pop John Paul 2

kamap tru na nau, meri i orait pinis.

Sister Marie Simon Pierre Normand bilong Frans i bin gat sik bilong han o sampela hap bodi bilong em i save guria tasol marasin na ol dokta I no inap oraitim em. Olsem na em bin stat long pre long helpim oraitim em long sik long Pop John Paul 2.

Bihain long sios i sekim ripot na olgeta samting long sait bilong haus sik, ol dokta na saiens, ol bin tok orait olsem dispela orait bilong Sister Marie em i wanpela mirakel i kamap aninit long prea em i mekim i go long pastaim hetman bilong Katolik Sios.

Em i 6-pela yia tasol bihain long Pop John Paul i bin dai long Epril 2, 2005. Tasol long laip na wok bilong en, em bin bilip long bikpela marimari bilong God na olsem, em bin makim dispela de, Me 11, olsem pestode bilong Divain Mesi. Dairekta bilong Vatiken Pres opis, Pater Frederico Lombardi, i tok wol i luksave long ol bikpela na gutpela wok bilong Pop John Paul 2 we yumi amamas long ol bikos ol i soim em olsem strongpela man bilong pre na toktok wantaim God, laikim Jisas na olgeta pipel long wol na moa yet, ol turangu na tu, strongpela prea pasin na laik long Mama Maria.

“Bikpela samting we planti i tingim em long en em long bikpela interes o laik long ol sik na stap long hevi, lukim na helpim ol lain i sot long kaikai, jastis na stap isi pasin maski em i karim pen na sik.

Long wankain taim tu, ol bai muvim kofin i gat bodi bilong dai Pop John Paul 2 long Groto klostu long Sen Peter’s basilica o sios i go long sapel long mein sios. Ol bai makim nupela hap we ol i putim kofin wantaim wanpela mabel ston i gat long em hap toktok,” Beatus Ioannes Paulus 11”. Ol bai putim bodi bilong em klastu long Sapel bilong Santu Sebastian we i stap namel long Sapel bilong Pieta na sapel bilong Bleset Sakramen.

Salens long ol papamama long lainim pikinini

Paulus Tali i raitim

OL LUTERAN papamama long Zomaga peris, Asaroka Seket long Isten Hailans i kisim salens long kisim ol pikinini bilong ol long kisim ol sakramen na tu, lainim ol long sait bilong lotu na ol i ken kamap ol memba bilong sios.

Pasto Issac Kondri bilong Zomaga Peris yet i bin mekim dispela toktok long wanpela spesel seremoni we 12-pela bebi i bin kisim sakramen bilong Baptismo na tripela yangpela i kisim sakramen bilong Konfemesen long las wik Sande long peris bilong em.

“Yupela papa mama, yupela i mekim gutpela pasin long bringim ol pikinini i kam long kisim baptais na ol i ken kamap nupela long nem bilong God Papa, Pikinini na Holi Spirit. Yupela i mas save olsem ol bebi i no gat sin, tasol ol i mas kisim baptais. Tu ol tripela yangpela yut i kisim Konfemesen nau i kisim blesing na i kamap memba bilong sios em bikpela samting,” Pasto Issac i tok.

“Long skul bilong konfemesen, yupela i lainim Tok bilong God, liklik Katekismo, tok bilip, histori bilong sios em ol bikpela samting. Long nau, bai yupela i kisim blesing na lukautim yupela yet gut. Na noken go insait long ol kain samting bai inap bagarapim yupela long en,” Pasto Issac i tok.

Sios wokmeri, Selina Willie i bin salensim ol Kristen long sakramen bilong Baptais.

“God, papa i laikim yumi ol Kristen long gat daun pasin, laikim na bilip yumi gat long en. Long dispela, em i kolim yumi stretpela manmeri na pikinini bilong em.

“Mi laik slalensim yupela papa mam long bringim ol pikinini i kam long kisim Baptais. Yupela i mas lainim ol pikinini long gutpela pasin we yupela papamama yet i mas go pas long soim ol,” Ms Willie i tok.

Em bin tok Baptismo i mekim yumi long stap fri na pas wantaim bikpela. Na tru, yumi i no stretpela long ai bilong God, tasol long wara we em i blesim pinis long nem bilong em, yumi kamap klin.

Em bin tok yumi ol Kristen i noken ting bilas tasol bai bringim yumi i go long heven, nogat. Bikpela samting em, daun pasin na laik pasin em. Krais i laikim long em na olsem, em I bin dai long Diwai Kruse long laikim bilong em tasol long yumi. Na yumi yet i mas klia gut long dispela na yumi noken paul nabaut.

Long wain kain taim, Pasto Issac i tok as bilong yumi ol Kristen em long bilip yumi gat long en we yumi kisim taim yumi I Baptais.

Bihain long lotu, liklik Kristen kongrigesen long Goremesa i serim kaikai wantaim papamama, ol Kristen na ol sios lida husat i bin kamap long lotu.

Presiden bilong Ega Lutheran Seket kisim bek sia

Paulus Tali i raitim

EGA Lutera n Sios seket long Simbu provins i gat bikpela plen bilong karimaut ol wok bilong em long dispela yia.

Presiden bilong seket husat ol i makim em bek gen long posisen, Andy Onguglo, taim em i tok amamas long ol i makim em bek, i tok em i gat planti plen na tingting long ranim gen edministresen bilong seket na tu, salom ol yangpela long seket i go long ol institusen o skul

bilong sios.

Seket i bin holim konprens bilong em long Kemukbaga em kongrikesen i stap klostu long Kundiawa taun.

Long konprens, ol i bin holim ileksen long makim ol sios lida long seket bilong ol we Mista Onguglo i bin resis wantaim narapela tripela man na i winim bek sia bilong em.

Long konprens, ol sios lida i bin kisim belgut long amamasim ol na mekim ol wok bilong ol.



RITRIT BILONG OL YUNAITET SIOS LIDA LONG PAPUA AILAN RIJEN:

Famili yuniti, sios lidasip na ol wok plen bilong Yunaitet Sios long Milen Be provins long dispela yia, 2011, em ol sampela bikpela samting we ol sios lida i bin lukluk long ol long wanpela bikpela bung bilong ol long Leleduhi, Milen Be.

Sampela meri i no laki

...Ol Saudi meri draiva nonap draivim kar

LONG kantri bilong yumi, PNG, na planti ol narapela kantri long wol tu, fridom em wanpela samting we yumi olsem ol man na meri i gat long skul, go long lotu, mekim ol sut toktok, ol man na meri i gat wankain rait na ol kain samting olsem.

Taim yumi stap amamas long fridom we yumi olsem ol man na meri i gat long mekim ol samting olsem ol meri tu i

draivim kar, putim ol kain klos long laik, stailim pes na gras, ol susa bilong yumi long sampela kantri i nogat ol dispela fridom.

Piksa em long ol Arab kantri, ol meri i save haitim pes, het na gras bilong ol wantaim teban o skaf ol i putim long karamapim o haitim pes na bodi bilong ol.

Narapela samting em long ol meri draiva. Long kantri Saudi Arabia, i gat lo i stopim ol meri long noken draiv.

Tasol ol ripot i soim olsem kantri (Saudi Arabia) i wok long glasim dispela lo na rausim.

Ripot i tok 128 pipel i sainim wanpela petisen we wanpela komiti i wok long glasim i stap nau.

Ripot i tok planti meri bilong Saudi Arabia i stap long ol narapela kantri i save long draiv na taim ol i go bek long kantri bilong ol, ol i mas draiv yet.

Ripot i tok em i no gutpela long lukim meri i stopim teksu long sait bilong rot taim em i sik o pikinini o famili memba i sik na em i laik kisim ol i go long haus sik.



HUSAT I TOK NOGAT GRAS I NO NAISPELA?

KAYLA Martell i gat 21 krismas na em i wanpela yangpela meri Amerika i nogat gras long het bilong em. Tasol dispela i no bin stopim em long winim Mis Delaware biuti o naispela meri resis long Amerika. Nau em bai go long resis bilong Mis Amerika. Wanpela kain kondisen we nogat man inap kontrolim i mekim na gras bilong Kayla i bin pondaun na raus olgeta, tasol dispela i no stopim Kayla long go insait long ol painim naispela meri resis taim em i gat 13 krismas yet.

Save i Ken Helpim:

NAU yumi lukim ol grasrut lain na ol mama i kirapim ol liklik bisnis na ol infomel maket long lukautim ol yet na ol famili bilong ol bikos laip i hat. Olsem ol narapela samting, i gat loa i stap we i karamapim ron bilong ol liklik bisnis na maket long siti, taun na ples.

Long olgeta Fonde, Meri Wantok bai putim ol statok we i karamapim ron bilong ol infomel bisnis na maket. Na ol samting we ol lain i ranim ol liklik infomel bisnis i mas save long en.

I gat nupela lo i promotim Infomel Bisnis.

Aninit long Infomel Sekta Dvelopmen na Kontrol Ekt 2004, pipel i ken statim na ranim ol kain infomel bisnis.

Wanem as bilong dispela loa?

Palamen i mekim dispela lo long helpim ron bilong infomel bisnis na sekim divelopmen o wok go het bilong ol na protektim o lukautim pablik helt na sefti.

Infomel Bisnis em wanem samting?

Infomel bisnis em ol liklik bisnis we i no save yusim ol bikpela masin o i no kostim bikpela mani long statim. Em i karamapim mekim, tilim na salim ol samting o givim sevis.

Wanem i no Infomel Bisnis?

Ol bisnis i hap bilong bikpela kampani;

Ol bisnis i save givim ol profesenel sevis olsem ol dokta, loya na ol akaunten;

Ol bisnis i save mekim inap mani we ol inap long baim takis.

Moa long neks wik.

Raun Lukim ol Meri na Pikinini:



SAPOTIM MERI SPOT: Dispela volibal tim bilong ol meri i amamas long kisim sapot bilong BSP beng. Tim i save pilai long Pot Mosbi Notwes komyniti volibal we memba Se Mekere Morauta i sponsaim. Tim i soim ol tisiot na ol botol wara we BSP i sponsaim ol long en. Tim i autim bikpela tok tenkyu i go long BSP long sapot na luksave bilong em long ol meri i go insait long spot pilai resis. Long Krismas na Nu Yia taim, Mosbi Notwes eria i bin gat komyniti volibal resis



FAMILI NA POROMAN SAPOT: Hai Komisina bilong Australia, Ian Kemish, i sindaun toktok wantaim Cragolini famili na ol lain long LNA kampani na Mausgras Golf Klub long Mosbi bihain long ol i donetim K100,000 i go long Hai Komisina bilong helpim ol lain long Kwinslen, Australia we hevi bilong bikpela ren na taitwara i bagarapim ol nogut tru insait long tripela wik nau.



TOK PISIN NEWS
from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)


**US Politisen ol i bin
sutim wantaim gan i orait**

WANPELA meri politisan bilong Amerika em ol i bin sutim em long gan long Tucson, Arizona, long wik i go pinis, nau i wok long pulim win em yet, bihain long ol i bin rausim masin o ventileta we em i save bin helpim em long pulim win. Nau ol i putim win wanpela gumi paip long winpaip bilong en na em i pulim win gut.

Yunivesiti Medikal Senta long Tuson (Tucson) i tok dispela Congresswoman, Gabrielle Giffords, i sik nogut yet.

Ol dokta i bin putim narapela paip o tiup bilong helpim em long kaikai, na ol i tok tu olsem em i wok long kamap orait isi isi bihainim taim em ol i ting bai kamap gut long en.

Dispela Congresswoman husat i memba bilong Democrats, pati em Presiden Barack Obama i memba bilong en, i bin wok long stap long wanpela bung klostu long wanpela bikpela stua long Tuson, taim wanpela man i bin sutim nabaut ol pipel wantaim gan bilong en, na kamapim bagarap long Misis Gabrielle Giffords na kilim sikspela ol narapela. Tupela long ol dispela pipel husat i bin dai em wanpela jas na wanpela liklik meri, krismas bilong en 9.



LAIK BRUK:
Wanpela pater long Saut Sudan i soim klia we bilong vot long referendum i askim sapos Saut Sudan i laik bruk lusim Not Sudan. (Foto: AAP Images)

**Ol Australia lida laikim
planti moa mani i go long
Kwinslen**

OL lida bilong Australia stat long nesanel gavman bilong Australia i mekim pinis bikpela askim i go long ol pipel bilong Australia long givim planti moa man ii go long Kwinslen haiwara apil.

Kwinslen na Komonwelt gavman i tokaut pinis olsem ol i bin putim \$10 milian dola wan wan i go long dispela apil, tasol Kwinslen lida Premia Anna Bligh i tok ol i laikim planti moa mani.

Em i tok long dispela taim, ol i kisim pinis 84 milian dola.

**Ol i kirapim ol imejensi
senta long Grantham**

LONG Kwinslen, ol i stat pinis long sanapim ol Imejensi senta long taun Grantham, na long wankain taim, ol i wok long go het long painim ol bodi bilong ol pipel husat i bin dai, bihain long ol bikpela haiwara i bin hamarim dispela liklik taun long Kwinslen.

ABC niusmeri, Sarah Hawke i ripot olsem namba bilong ol pipel husat i bin dai long ol dispela haiwar i stap nau long 17, na 14 ol narapela i wok long lus yet.

Em i tok tu olsem, dispela wik, ol i bin painim bodi bilong wanpela meri long wanpela haus long Grantham long wik i go pinis.

Deputi Polis Komisina long Kwinslen, Ian Stewart i tok ol i wok long lukluk gut long olgeta ples bilong painim bodi bilong ol pipel.

Na Premia Anna Bligh i tok, ol i putim pinis ol haus sel bilong helpim ol pipel wantaim kaunseling, o ples we ol pipel i ken go na

bungim wanpela narapela, na tu, ol i givim pinis 25 ol siping kontena we ol pipel i ken putim na lokim ol samting bilong ol em ol i no bin lusim long ol haiwara.

**Vot i soim ol pipel bilong
Sudan i laikim nupela
stet**

LONG Sudan insait long Afrika, ol i tokaut pinis long namba wan risal bilong vout em ol i bin mekim bilong painim sapos ol pipel i laik kamapim stet bilong ol yet, i soim pinis olsem ol pipel i laikim nupela stet o kantri bilong ol yet. Planti long ol pipel husat i bin vout na soim laik long ol i laikim stet bilong ol yet em ol pipel bilong Sudan husat i save stap nau long Yurop.

Dispela referendum em i hap bilong wanpela tok orait em ol i bin sainim sikspela yia i go pinis, bilong pinisim wanpela sivil woa em i bin wok long go het long planti yia tru. Moa long 97 pesen long ol pipel husat i bin vout long Yurop i laikim tru olsem Saut Sudan i mas bruk lusim Not Sudan na kamapim kantri bilong ol yet.

Bai ol i save fainal risol long mun bihain. Ol intanesenel obsevas, wantaim tu spesol mausman bilong Briten i go long Sudan, Michael Rider, i bin tok em i amamas long we em ol i bin holim dispela referendum.

"Luksave we i kamap long dispela wok i soim olsem em i kamap isi, na ol i stiaim gut kamap bilong em. Olsem na mi no ting bai gat planti tingting i pait wantaim dispela mipela i lukim pinis," em i tok.

**Ol pairat o raskol bilong
solwara i holim kal-**

**abusim wanpela kago sip
bilong Saut Korea**

OL pairat bilong Somalia long Afrika i bin kisim na holim pasim wanpela kago sip bilong Saut Korea wantaim 21 boskru bilong en.

Wanpela mausman bilong foren ministri bilong Saut Korea, i bin tokaut olsem ol pairat i bin go insait long dispela sip na kisim em long Indian Ocean. Hevi bilong dispela sip em 10,000 tan, na em i save karim ol kemikal o marasin na Samho Shipping kampani i papa long en.

Ol boskru long dispela bot, em etpela bilong Saut Korea, tupela bilong Indonesia, na 11-pela bilong Burma.

Insait long ol dispela yia i go pinis, pasin bilong stilim na holim pasim ol sip long Somalia i bin go antap tru, na nau, ol intanesenel woasip bilong ol arapela kantri i save mekim ol wok patrol long ol solwara klostu long Somalia bilong traim long daunim o stopim ol dispela kain pasin nogut.

**Narapela Australia soldia
i bagarap long
Afganistan**

NARAPELA soldia bilong Australia i kisim bagarap long pait long Afganistan.

Dispela soldia i bin stap wantaim lain bilong em taim ol i bin mekim ol wok patrol long Chorah Valley rijen bilong Uruzgan provins taim sampela i bin sutim ol wantaim wanpela han bom long Sande apinun.

Wanpela man husat i save tanim toktok, o intepreta i bin dai na wanpela soldia bilong Afganistan yet i bin kisim bagarap.

Ol i bin kisim dispela Australia soldia i go

long Kandahar na nau em i wok long kamap orait gen.

**Ol haiwara bai hamarim
Viktoria**

SAMPELA lokol komyuniti long Westen Viktoria nau i wok long rere long ol haiwara bihain long mak bilong ol bikpela wara i bin go antap, na ol i ting bai ol i lukim planti moa haiwara long ol dispela de i kam.

I kam inap nau, ol haiwara i bagarapim pinis 29-pela taun na moa long 13 haus tu i pulap long wara.

Long Tasmani, ol pipel long not i wok long stat long go het long klinim ol ples bilong ol bihainim ol bikpela haiwara i bin bagarapim ol ples bilong ol tu.

**Presiden bilong Brasil
makim tripela de
hauskrai**

PRESIDEN Dilma Rousseff long Brazil i makim pinis tripela de we ol pipel i ken soim bikpela bel sore bilong ol long namba bilong ol pipel husat i bin dai bihainim ol bikpela haiwara i bin kilim moa long 600 pipel.

Ol wokman husat i wok long bringim bodi bilong ol dai manmeri na pikinini i tok olsem ol i wari olsem nogut namba bilong ol pipel husat i bin dai long ol dispela haiwara bai go antap moa yet.

Ol i ting olsem 14 tausen pipel i bin lusim ol haus bilong ol long ol dispela haiwara.

Ol atoriti i mekim pinis bikpela askim i go long ol pipel long givim blut, ol botol wara, kaikai na ol marasin.

Pacific BEAT

Listen to Radio Australia
101.9FM Port Moresby

4, 5, 6am & 4pm, 5pm
including sport

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.

WANTOK
KOMENTRI

'Mi stap liv, tasol nogat kot, na mi kam bek wok'

SAPOS yu wanpela man husat i go long kot long wanpela asua yu mekim, bai yu no inap long abrusim dispela kot, maski yu wok long opis o yu kisim anuel liv o malolo bilong yu long wok.

Tasol i luk olsem dispela samting liv, o malolo long wok i kamap wanpela rot bilong abrusim kot.

Tru tumas, Sir Michael Somare, husat i stap long politiks moa long 40 krismas olgeta, i no lus long painim rot bilong abrusim kot na strongim nem bilong em olsem praim minista bilong kantri.

Dispela wik, Sir Michael i tokaut olsem em i wetim kot long sanapim wanpela lidasip traibunel o kot bilong sekim em, tasol i nogat wanpela kot i sanap yet, olsem na em i kam bek wok.

Long taim i gat askim i kamap long sait bilong watpo na em i bin lusim sia pinis na nau em i kam bek gen, opis bilong praim minista i tok olsem Sir Michael i no bin lusim opis bilong em, nogat. Em i bin stap long liv tasol.

Sore tru long ol liklik manmeri husat i sanap kot na ol i laik traim kliarim nem bilong ol. Maski sapos ol i stap yet long wok, o ol i no stap wok, na ol i stap long wok malolo bilong ol, ol bai mas redi yet long sanap kot.

Ating dispela samting kot i no bilong ol praim minista, laka?

Olsem na ol i ken stap na taim ol i lukim olsem kot i laik kamap, bai ol i kisim wok malolo bilong ol.

Oposisen memba, Jamie Maxtone-Graham i tokaut pinis dispela wik tu, olsem ol memba i no olsem ol arapela gavman wokmanmeri.

Ol memba i no save kisim liv. Nogat. Wok bilong ol em i wok bilong 24 awa, na i nogat luksave long ol i kisim liv.

Pasin bilong abrusim mekimsave, em bipo, i no bin olsem tude.

Taim lida i bin laik abrusim mekimsave, planti ol arapela manmeri long komyuniti i no bin save tumas long luksave long ol rot memba bai mekim long traim abrusim kot.

Tasol tude, ol manmeri bilong yumi i kisim bikpela skul pinis.

Olsem na maski ol lida i ken yusim ol kain kain toktok na rot bilong abrusim mekimsave, bai gat ol manmeri long pablik i luksave na klia long paul pasin ol i mekim.

Sapos i gat ol lida bilong tude, husat i wok long abrusim yet kot bilong ol asua bilong ol, bai yumi lukim ol i pundaun long dispela paul pasin bilong ol yet.

Yu inap abrusim mekimsave tude, tasol em bai painim yu yet.

WANTOK

Published Weekly, Thursday, for
Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Neville Choi

Published at
Section 58, Allotment 3
Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.



Sekim gut sindaun bilong polis fos

LUK olsem wok bilong ol polisman insait long Papua Niugini i wok long bruk bikos i gat bruk namel long ol polisman yet.

Em bikpela lukluk bilong pablik bihainim ol nius ripot na ol toktok i kamap pinis long las wik i kam.

Tasol Ekting Komisina bilong Polis, Tony Wagambie, wantaim namba tu bilong em Fred Yakasa, i tok i nogat kain bruk olsem i stap. Ol polisman i stap wanpela tasol.

Em orait, em ol kain toktok bilong ol bikbos long olgeta gavman opis o insait long gavman na tu long ol bikpela bisnis na kampani.

Ol bos save laik holim gut nem bilong opis na tromoi tok antap olsem.

Tasol yumi lukim long las wik olsem ol polisman long McGregor Bareks long Mosbi i bin blokim rot bikos sampela polisman bilong het opis bin pulim kar long wanpela wanwok bilong ol na ripot long het opis olsem kar ya i gat ol bia stap long



en. Em orait, em samting bilong wok painimaut ken tokaut husat i tru na husat i no tok tru.

Long Vanimu, ol polisman bilong Mosbi bin go long mekim wok long boda i paitim polisman long Vanimu. Turangu polisman ya em olsem aut stesen polisman husat i save wok long lukautim lo na oda long Vanimu na Sandaun provins. Tasol ol biknem polisman long Mosbi go na bagarapim turangu.

Em orait, em ol kain toktok we ol bikbos bilong polis bai tok em i no tru.

Bikpela samting nau em dispela kain ripot em i no gutpela tru long lukluk long ol polisman olsem strong na banis bilong mipela. Ol polisman i stap, na lo

na oda i banisim mipela gut long sindaun gut na wokabout gut long ol hevi na trabel.

Sapos kain hevi o bruk olsem i stap namel long ol polisman, bai mipela ol pablik i kisim strong long husat gen?

Bikos ol polisman i no inap long kam helpim mipela gut taim hevi i kamap na mipela nogat hap long go long kisim helpim.

Polis em ensin tru tru bilong kantri long lukautim sindaun na wokabout bilong ol pipel olsem na noken larim kain hevi olsem i kamap. Wok bilong ol mas gutpela na sindaun bilong ol tu mas gutpela.

Em bikpela wok bilong gavman na ol bos bilong polis long lukautim gut ol wokman bilong yumi. Noken tru larim ol kros go kam long ol yet bikos dispela i ken soim olsem sik bai kamap long polis fos long daunbilo na go antap.

Sampela yia i go pinis yumi lukim na harim bruk stap namel long ol bosman

bilong polis yet long Mosbi we ol bin paitim tu wanpela sinia polisman long ai bilong pikinini bilong em. Em wankain hevi we i bin kamap bipo na nau ol polis fos gen i kamap wantaim wankain hevi bilong bruk namel gen.

Inap nesenel gavman i kam insait long skelim dispela bikos nogut sampela kain sik bilong bipo i stap yet na kamap gen. Sapos sik i gat antap long ol bosman yet, orait gavman mas stretim hariap bai dispela sik noken go bikpela na kisim ol liklik wokman bilong polis fos we i bai bagarapim tu gutpela wok bilong ol liklik polisman insait long ol distrik na provins.

Hevi bilong het opis long Mosbi i noken go daun long kain longwe bus ples olsem Vanimu, Tari, Manus, Daru na ol arapela moa.

Stretim hevi bilong ol polis hariap bikos mipela ol pipel lukluk na putim was i stap.

Polis em strong na banis bilong mipela.

SEFTI BILONG LAIN I YUSIM ROT EM I NO WANPELA GEM



NOKEN WOKABAUT LONG ROT.

LUKIM LONG KAR I KAM LONG YU.

Birua na bagarap save kamap long ol manmeri I wokabaut long rot na I no save lukluk long wanem kar I kam long ol. Yu mas wokabaut long rot we kar I ron I kam olsem long yu na mas lukluk olgeta taim. Em taim nau long tingting strong long ROT SEFT – em I no wanpela PILAI

ROT SEFTI em ino wanpela PILAI



Oi Bobket greda i soim strong
NAU we i gat planti pipia na graun malumalu i stap long olgeta hap long Rockhampton long Australia, ol kain masin olsem ol liklik bobket greda nau i wok long soim strong bilong ol long go insait long ol ples olsem kriket graun, na klinim rausim ol pipia.



Hatwok i lus nating
FAMA Grevor Brownlie, husat i save groim koton diwai long ples Theodore long sentral Kwinslen i nogat moa koton diwai i sanap.



Ami helpim long klinim ples
OL soldia bilong Australia Ami i wokbung wantaim ol manmeri long Brisbane siti long kliarim rot long ol pipia. Moa long 75 pesen bilong Kwinslen em ol i tok em i disasta son, bihain long ren i pundaun hamas wik nau na haiwara hevi i kamap.



Meri winim haiwara
WANPELA yangpela meri long ples Toowoomba we haiwara i bin pulim long taim bikpela haiwara hevi i kamap long Januari 10, i laki tru taim ol arapela manmeri i pulim em na rausim em long bikpela haiwara. Toowoomba, we i stap long westen sait bilong Brisbane i bin karim bikpela hevi tru.



Traipela haiwara i karamapim Horsham long Viktoria
OL traipela haiwara i bin karamapim ples Horsham long sentral wes Viktoria, long Januari 18, 2011. Ol lain i stap sindaun long sait bilong Wimmera Riva i kisim tok lukaut pinis long banisim gut ol haus bilong ol, long wanem mak bilong haiwara, ol i tok bai wankain olsem haiwara i bin kamap long 1909 haiwara.



Haiwara mak go antap moa long Horsham
RYAN Arthur, wanpela yangpela mangi bilong Horsham long Westen Viktoria, i stiaim kanu bilong em ausait long haus na banis bilong famili bilong em. Haiwara mak i go antap tru na planti ples i silip aninit long wara pinis.

Bung bilong sevim Sikau bai kamap

WANPELA bikipela woksop long konsavesen o banisim bilong ol sikau na tri kengaru o sikau bilong diwai, bai kamap neks wik long Loloata Risot i stap ausait long Pot Mosbi siti.

Woksop bai bungim ol praivet kampani, ol gavman opisal bilong PNG, na ol lokol na intanesenel NGO mausmanmeri.

Dispela woksop bai kamap long Janueri 24 i go inap 27.

Menesa bilong Threatened Species Program long Wol Wailaip Fan (WWF) Australia, Michael Roache, i tok "as tingting bilong dispela woksop em bilong kamapim wanpela eksen plen bilong ol sikau na tri kengaru bilong Niugini (em PNG na Papua) long 10-pela yia i kam."

Ol dispela enimal em ol i kam aninit long wanpela bikipela nem em ol Makropot (Macropod). Ol dispela lain enimal i kamap long Australia na ailan bilong Niugini, na tu sampela ol liklik ailan.

Ol makropot bilong Niugini, em ol tri kengaru, em ol i gat bikipela nem long kalsa bilong pipel long ol dispela ples.

Planti ol spisis o lain enimal i wok bungim hevi bilong namba i sot long wanem pasin bilong yumi ol man bilong kilim ol bilong abus, na kukim rausim lain bus bilong ol long stap sindaun na bringim ol nupela ol lain spisis olsem ol dok na pusi.

Mista Roache yet bai het fasiliteta o trenna bilong dispela woksop.

Em i tok dispela bung bai pulim ol mansave na ol lain i save raitim ol polisi, bai ol i wok wantaim long painim ol rot bilong strongim banis bilong ol dispela enimal spisis, na long wankain taim, bai ol i ken promotim wok kon-



10-pela yia eksen Spisis Eksen Plen i gat ol stia i stap long en bilong banisim gut na lukautim olgeta kain spisis makropot enimal.

I gat 72 spisis makropot i stap long Australia, Papua Niugini na Indonesia provins bilong Papua na Wes Papua.

Long dispela 72 kain spisis, moa long hap bilong ol em namba bilong ol i sot na nem bilong ol i stap pinis long IUCN Red List of Threatened Species.

Ol dispela lain makropot enimal i nidim helpim bilong ol manmeri nau bai namba bilong ol i ken go bek antap.

Wok konsavesen long ol enimal olsem ol makropot, long Australia na long Papua Niugini i nogat inap sapot.

Sapos i gat wokbung na luksave long strong bilong ol dispela enimal long kantri bilong yumi, bai yumi ken lukluk long lukautim na banisim ol gut bilong taim bihain.

savesen na developmen, we ol i ken yusim ol dispela makropot olsem wanpela kain 'fleksip' o ambeseda spisis.

"Spisis Eksen Plen we bai kam aut long dispela woksop bai stiaim ol wok konsavesen long ol yia i kam wantaim luksave long strongim namba bilong olgeta makropot enimal insait long asples bus bilong ol yet, na bai ol i ken sindaun gut wantaim ol man," em i tok.

Intanesenel Fleksip Spisis Program bilong WWF i save yusim ol enimal spisis bilong promotim wok konsavesen bilong ol na ol bus bilong ol. Wankain tasol olsem ol arapela enimal tu i save

stap long wanpela bus tasol.

WWF i tokaut pinis long wok bilong em long luksave long ol enimal we namba bilong ol i wok long pinis, olsem ol elefan bilong Afrika, na ol solwara trausel, na bai ol i mekim wankain wantaim ol wolabi o sikau, kengaru na ol wanfamili enimal bilong ol."

Mista Roache i tok WWF i gat bilip olsem sapos em i ken wokbung wantaim ol gavman bilong PNG na Indonesia, na ol provinsel na stet gavman, ol lokol komyuniti, risetsa manmeri, ol rikavri tim, ol non gavman ogenaísesen na ol arapela long kamapim wanpela

Yu save long sikau bilong diwai?



Em i wanem kain enimal

Ol i no olsem ol kengaru, em ol wan famili tasol. Ol lek na han bilong Tri Kengaru, em i wankain longpela tasol. Ol Tri Kengaru i gat strongpela han bilong halivim ol i kalapim ol diwai ol i save silip long en.

Bikipela bilong em

Longpela: 41 – 77cm

Longpela bilong tel: 40 – 87cm

Hevi bilong en: i go inap 14.5 kilogram

Ples em i save stap

Ol bikipela lain bus na diwai long Indonesia, Papua Niugini na Australia.

Namba na ples ol i save stap

Ol tri kengaru i karim bikipela hevi long ol i nogat moa ples bilong stap, na planti spisis i bungim dispela hevi. Wondiwoi tri kengaru, em namba bilong ol klostu pinis (nogut i pinis olgeta, i no klia), na i mas i gat 50 tasol i stap. Wankain, dingiso tri kengaru i lukim namba bilong em i go daun tu, abrusim 80% mak long las 30 yia i go pinis.

Em i save kaikai wanem:

Em i save stap sindaun long ol diwai, olsem na tri kengaru i save kaikai ol lip na prut, tasol ol i save kaikai prut i pundaun long graun pinis. Ol enimal i save kaikai ol arapela samting olsem ol gren, flaua, wara bilong diwai, ol kiau, ol yangpela pisin, na skin diwai tu.

PNG givim helpim long ol Kwinslen taitwara birua

Veronica Hatutasi i raitim

INSAIT long tripela wik nau, yumi long PNG i lukim neiba bilong yumi, Australia, i bungim bikipela hevi long bikipela ren na taitwara.

Moa yet, Kwinslen (Queensland), em dispela stet long Australia we i stap klostu stret long PNG na planti PNG lain i stap, wok na skul long em, i kisim taim nogut tru, dai na bagarap long laip, sindaun na i lusim olgeta samting olsem ol haus, kar na ol narapela samting ol bin gat long laip bilong ol.

Ol taun long Kwinslen olsem Toowoomba, Ipswich na Brisben i kisim bikipela bagarap nogut tru. i gat bilip olsem samting olsem 20 pipel i dai taim taitwara i karim ol, pas long kar insait long taitwara na dai na ol kain rot olsem. Planti pipel tu em ol i kisim ol i go stap long ol kea senta.

Ol i tok dispela hevi na birua bilong bikipela ren na taitwara long Kwinslen em i bikipela na nogut moa long ol narapela we Australia i lukim long histori bilong em. Em i winim tu dispela i bin kamap long 1974 long Kwinslen.

Long las wik trinde, Konsulet bilong PNG long Brisben em ol bin pasim long larim ol woklain na ol famili bilong ol i lusim opis konsulet i go long ol seif eria.

Paul Nerau em Konsulet Jenerel i bin tokim ol woklain bilong em long pasim opis na muv i go long ol seif ples bikos opis i stap klostu long Wara Brisben we i bin solap na bruk. Na bagarapim na karim olgeta samting i stap long rot bilong em olsem dispela i kamap long Toowoomba na Ipswich.

Nu Saut Wels i narapela stet i stap klostu long Kwinslen na Viktoria tu we dispela birua long bikipela ren na taitwara i wok long bagarapim.



HELPIM TAITWARA BIRUA: famili na poroman bilong Luciano GRAGNOLIN na Michael Nali i givim K100,000 donesen i go long Hai Komis bilong Australia lan Kemish. Poto Veronica Hautasi

PNG i save kisim bikipela mani, marasin na ol narapela helpim i kam long Australia olgeta taim kantri i bungim ol hevi long taitwara, graun i bruk, guria, solwara i solap o sunami na ol narapela hevi na birua we netja i kamapim.

Long las wik, Praim Minista, Sam Abal, i bin tok promis olsem gavman bilong PNG bai givim K10 milion long helpim ol pipel long Kwinslen we bikipela taitwara i bagarapim ol.

Hai Komisina bilong Australia, Ian Kemish, i bin go long opis bilong Mista Abal long autim tok tenkyu bilong em i kam long gavman na pipel bilong PNG long helpim ol i givim i go long lain bilong em long Kwinslen husat i stap long bikipela hevi.

Mista Kemish i tokim Mista Abal olsem taitwara i bin abrusim ol ruf bilong ol haus long Kwinslen na Nu Saut Wels na planti manmeri i gat long em tu sampela lain bilong PNG, i stap long hevi we taitwara i kamapim.

Mista Kemish i tok gavman bilong Australia i autim bikipela tok tenkyu long helpim we PNG i givim we i soim olsem tupela kantri bai skruim wok bung na helpim pasin namel long ol.

Long las wik Fraide tu, bisnis man na papa bilong L&A, Luciano Cragnolini na ol na famili bilong em i bin donetim K50,000 i go long Australia Disasta Rilif Apil taim poroman bilong em na pastaim Palamen memba, Michael Nali na famili na ol pren bilong em long mausgras Golp Klab i bin givim K50,000 tu i go long dispela taitwara apil. Na olgeta manimak we tupela famili na ol pren i givim em K100,000.

Long taim Mista Cragnolini na famili na tu, Mista Nali na ol lain poroman i prisenim K100,000 sekmani i go long Mista Kemish, ol bin tok ol i sori tru long lukim ol piksa na stori long TV na ol narapela nius long bagarap, wari, hevi na dai we pipel i bungim

na ol i laik givim helpim bilong ol long ol pipel bilong Kwinslen.

Tupela i bin tok em i taim nau long ol pipel bilong PNG i givim helpim bek i go long Australia long olgeta helpim em na pipel bilong em i save givim long PNG long ol taim nogut bilong PNG.

"Em i taim nau long yumi bung wantaim na wokim samting long helpim pren bilong yumi, Australia.

"Mipela i bung wantaim ol pren bilong mipela, Mista na Misis Cragnolini bilong L&A Konstraksen na mipela i opim wanpela tras akaun long BSP Beng we ol lain i laik givim helpim mani bilong ol i ken dpositim o putim long em long helpim ol lain i stap long bikipela hevi," Mista Nali i makim maus bilong tupela grup i bin tok. Tras Akaun namba we pipel i ken dpositim mani i go long em: AKAUN NEM: AUSTRALIA DISASTER RELIEF APPELA. BANK: BANK OF SOUTH PACIFIC. ACCOUNT NUMBER: 1002739603.

Long wankain taim, Hai Komisina, Ian Kemish, taim em i autim bikipela tok tenkyu long helpim bilong tupela bisnis lain na ol famili na poroman bilong ol i bin tok dispela donesen i soim helpim pasin we ol bisnis komyuniti long PNG i gat.

Mista Kemish i tok bai Hai Komisina i transferim ol fan i go long akaun bilong Primia bilong Kwinslen we gavman bilong Kwinslen i bin opim long en.

Long tude, Gavana bilong Enga, Peter Ipatas, i givim K20,000 i go long Mista Kemish bilong helpim ol Kwinslen pipel we taitwara i bagarapim ol. i gat bilip olsem long ol de i kam,

Moa lain long ol narapela hap bilong PNG tu bai givim helpim bilong ol tu.

Lae polismanmeri helpim ol turangu long Australia

Bustin Anzu i raitim

MOA long 300 polismanmeri long Lae siti wantaim ol meri pikinini bilong ol i pusim wilbaro long bungim sampela mani long tingim ol lain long Australia husat i kisim bikipela bagarap long bikipela ren na ples bilong ol i bagarap long stat bilong dispela mun.

Australia i save helpim PNG long planti samting tasol dispela pasin bilong pusim wilbaro em long tingim ol pipel husat mani o takis bilong ol em ol i save helpim mipela.

Man husat i bin go pas long dispela apil bilong Queensland Hai Wara na big bos bilong polis long Momase, Giossi Labi, i tok Australia i bin helpim ol long planti wankain hevi long Papua Niugini na nau em taim bilong ol long bekim bek.

Ol bikipela hevi olsem ais long Hailans long 1972, haiwara bilong Bumbu long 1983, maunten

pairap bilong Rabaul long 1994, Tsunami bilong Vanimo long 1998, Oro haiwara long 2007 na balus pundaun long 2009 em sampela bikipela hevi we ol i bin givim han.

"Olsem na mipela i mas soim pasin bilong sore na helpim ol tu long taim nogut bilong ol," Labi i tok.

Labi husat em asisten komisina bilong Polis long Momase, i tok dispela mani ol bai helpim ol lain Queensland (Kwinslen) long Australia em i no bikipela mani tasol ol i laik soim han mak bilong ol long pasin bilong helpim narapela.

Nesenel Gavman i putim pinis K10 milien long helpim ol Australia na tu sampela bisnis manmeri na kampani i putim sampela mani long helpim dispela wok.

Australia em wanpela kantri Papua Niugini i save kisim bikipela helpim long sait bilong aid.

Ol polisman meri wantaim ol

pikinini bilong ol i pusim wilbaro long 5-pela ples insait long Lae siti na planti manmeri i bin tromoi sampela mani long ol wilbaro we ol i bin pusim.

Ol bai pusim wilbaro long dispela wik Fraide na bihain ol bai bungim olgeta mani na givim i go long ol lain Australia, husat i makim gavman bilong ol na save stap long Lae siti.

Labi i kamapim dispela tingting bihain long lukim long ol TV olsem planti manmeri long Queensland i kisim bagarap long hai wara we i bagarapim ol haus, stoa, pilai graun na tu ol rot na ol bikipela opis long Brisbane (Brisben).

"Olgeta TV i stori long hevi bilong Queensland na mi lukim na mi sore nogut tru olsem na mi kamap wantaim dispela tingting long bungim sampela mani na givim i go long ol.

"Em bai no inap planti tasol dispela i pasin sore bilong mipela soim long ol," em i tok.



■ ikam long pes 16

Praioriti Spisis:

WWF i lukim ol tri kengaru olsem wanpela praioriti spisis. Bikos ol i tok em i wanpela bikipela spisis tru i mas stap long graun. Olsem na em i wok strong long lukautim bai namba bilong ol i ken go antap gen.

Wanem ol birua bilong em:

Ol bikipela birua bilong tri kengaru spisis em taim ol man i kilim ol bilong abus na taim ples bus na diwai bilong ol i bagarap.

Taim ol i nogat moa ples bilong stap, olgeta i save go stap bung long wanpela hap lain diwai tasol. Planti hap bus bilong ol, ol i save katim daun na kliarim bilong wok kopi, rais o groim wit. Taim ol i nogat moa diwai, ol dok i save kilim planti long ol.



Program bilong Wanwan De

De - Mande - Fraide

6am - 10am - Sankamap show - Host: Kas. T
6:00am - Major Nius Bulletin
6:15am - Komuniti Notis Bod
6:25am - Taim Bifo - wangepela singsing b'long bifo.
6:30am - Nius Hetlains
6:45am - Bonde grilins
7:00am - Major Nius Bulletin - YUMIFM Nius Senta
7:05am - YU TOK - komiuniti awenes program
7:15am - WAN 4 DA ROAD - Hit Prediction
- niupela singsing
7:30am - Tok Pilai - stori b'long putim smail long nus pes.
8:00am - Major Nius Bulletin - YUMIFM Nius Senta
8:05am - YU TOK - komiuniti awenes program
8:15am - "Papa Heni Fuka Show".
9:00am - Nius Bulletin - YUMIFM Nius Senta
9:15am - Luksave long komiuniti (Redio Pilai) Fraidei

Tasol
9:30am - Final aua cruz
10am - 3pm - Morin Trek na Belo Pack
- Host: Mummy DASH
10:00am - Major Nius Bulletin - YUMIFM Nius Senta
10:05am - YU TOK - komiuniti awenes program
10:15am - Kona b'long yu.
10:45am - YUMI PANIM WOK Segment
11:00am - Nius - YUMIFM Nius Senta
11:05am - YU TOK - komiuniti awenes program
11:10am - Lukautim yu yet - Helt toktok
11:30am - Nius Hetlains b'long Belo Taim
- Laik b'long yu - Niupela singsing previu
12:00pm - Major Nius Bulletin - YUMIFM Nius Senta
12:05pm - YU TOK - komiuniti awenes program
12:10pm - BELO Pack - Belo taim rekwas na dedikesen
12:15pm - Komuniti Notis Bod
12:20pm - BELO Pack - Belo taim rekwas na dedikesen
1:00pm - Nius - YUMIFM Nius Senta
1:05pm - YU TOK - komiuniti awenes program
1:10pm - BELO Pack - Belo taim rekwas na dedikesen

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment
3pm - 7pm - Avinun Draiv Taim - Host: Vaviessie
3:00pm - Nius - YUMIFM Nius Senta
3:05pm - YU TOK - komiuniti awenes program
3:10pm - Avinun cruz
4:00pm - Nius - YUMIFM Senta
4:05pm - YU TOK - komiuniti awenes program
4:10pm - FOAPELA KAM GUD LONG 4 - foapela singsing
4:30pm - Nius Hetlains
4:45pm - YUMI PANIM WOK Segment
5:00pm - Major Nius Hetlains - YUMIFM Nius Senta
5:05pm - YU TOK - komiuniti awenes program
5:10pm - 6:00pm - KULCHA Musik (1 hr) skelim lokal musik 6pm - 7pm
- NAIT BEAT - Host: Vaviessie
6:00pm - MAJOR NIUS BULLETIN - YUMIFM NIUS SENTA
6:05pm - YU TOK - komiuniti awenes program

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
- Host: Angra Kennedy
7:00pm - Nius - YUMIFM NIUS SENTA
7:05pm - YU TOK - komiuniti awenes program
9:00pm - 00am - Nait Beat - Isi Cruz long nait
00am - 6am - BRUKIM TULAIT SHOW - Host: Tuluvan
Vitz/Talaigu Sopi/Bata Rat
00:00 - Early Monin Taim Cruz (ol lain brukim tulait shift)
- Musik / Request / Tok pilai
- Kipim Kampani long ol nait shift.
Wikens - Sarere
6am - 10:00am - Wiken Sanrais Host: Talaigu Sopi
7am - 9am - Sarere Monin Cruz
9am - 11am - Monin Treks
11am - 1pm - National Weekly Hit Parade - Host: Kasty - 1st aua NWHP
12:00pm Nius - YUMIFM Nius Senta
12pm - 1pm - 2nd aua NWHP

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm Nius - YUMIFM Nius Senta
2pm - 6pm - Sarere Avinun Cruz
6:00pm Nius - YUMIFM Nius Senta
6pm - 00:00am - Nait beat
7pm - 9pm - Coca Cola Garamut
9pm - 00:00am - Nait cruz
00:00am - 6am - Brukim Tulait Show
Wiken - Sandei
6am - 10am - Wiken Sanrais / Sandei Monin wokabout Musik
10am - 12noon - Monin Treks
12noon Nius - YUMIFM Nius Senta
12 - 2pm - Sandei Belo Taim Music
2:00pm Nius - YUMIFM Nius Senta
2pm - 6pm - Sandei Avinun Draiv Music
6pm - 8pm - Nius - YUMIFM Nius Senta
6pm - 8pm - GOSPEL REKWES AJA
8pm - 00:00am - Late Nait Cruz - Poroman Aua
00:00am - 6am - Brukim Tulait Show

Program Director - YUMIFM - Kasty

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Spots
7.30PM Nius na Karen Afecas
8PM Helt
8.15PM Musik
8.30PM NIUS
8.40PM Spots Riplei
8.55PM Musik
9PM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afecas
8PM Mama Graun
8.15PM Musik/Spots
8.30PM NIUS
8.40PM Helt Riplei
8.55PM Musik
9PM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afecas
8PM Focus
8.15PM Musik/Spots
8.30PM NIUS
8.40PM Mama Graun Riplei
8.55PM Musik
9PM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afecas
8PM Youth
8.15PM Musik/Spots
8.30PM NIUS
8.40PM Focus Riplei
8.55PM Musik
9PM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afecas
8PM Wantok
8.15PM Musik
8.30PM NIUS
8.40PM Youth Riplei
8.55PM Musik
9PM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Wantok
8PM Lokal Ben
8.30PM Nius
8.40PM Musik/Chit Chat
9PM Stesen Pas

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Femili Blong Serah (Redio Plei)
8PM Lukluk Bek Long Wik
8.30PM Nius
8.40PM Musik/Chit Chat
9PM Stesen Pas

Raun wantaim Wantok kru ... Bum Bokis musik senisim ol yangpela

Nicky Bernard i raitim BUM BOKIS musik i wok long strong long kantri bilong yumi Papua Niugini, dispela bum bokis em wankain tru olsem ol liklik redio, yumi save baim na harim ol nius o singsing we save kam long ol redio stesen long kantri, na tu i gat ples we yumi

save putim ol keset o CD na harim ol singsing o musik. Tasol dispela redio o bum bokis em nogat, yu ken harim liklik redio long en tasol bikipela tru em musik tasol, musik bai yu no inap long putim keset o CD moa, taim yu bai dispela bum bokis musik yu mas baim fles draiv o memori stik, dispela samting



BUM BOKIS SAPLAI: New Century Electronics em wangepela stoa save salim ol kainkain bum bokis musik, hia ol wokman meri bilong stoa, Herry Naime, Wendy Willie, Wabo Kuai na Heni Owen i soim ol bum bokis. Poto Nicky Bernard.

93FM YUMIFM National Weekly Hit Parade: Sponsor: Digicel - bigger, better network. Produced & Host by: Kasty. Statistics: Talaigu Sopi & Poruman Crew. Week Ending: Saturday - 22nd January 2011. Table with columns: Week Before, Last Week, This Week, Charting Song, Artist.

em bai yu putim go long komputa na kisim olgeta singsing o musik bilong yu insait long komputa. Bum bokis musik nau i stap pinis long olgeta hap long kantri bilong yumi, planti bilong ol yangpela manmeri bilong tete save laikim tru dispela musik bokis. Dispela bum bokis i gat kainkain sais bilong em, i gat liklik, namel sais na bikipela sais we bai yu putim tasol long pawa na harim ol musik

bilong yu, ol liklik na namel sais, em ol olsem mobail telefon we yu ken sasim long pawa tasol na karim raun, sapos batri flet yu ken tu usim bilong mobail telefon. Dispela bum bokis nau i putim tingting bilong ol liklik mangi na meri, ol save laikim tru long wanem pairap bilong em olsem tru ol bikipela redio, maski em liklik sais tasol krai bilong em inap long 4 o 5-pela haus klostu long yu ken harim.

Wantok Niuspepa i raun na askim sampela liklik mangi na meri long wanem as na ol tokim papamama long baim bum bokis musik bilong ol, na planti i tok ol laikim long wanem ol ken lainim brek danis, rep danis na sampela moa danis, na sampela i tok Wantok Niuspepa olsem, hat wok long baim CD o kaset ol ken harim feveret musik o singsing bilong ol long wangepela fles draiv tasol.

EMTV Television Guide

FONDE, JENUERI 20 2010

5.00AM G ENJOYING EVERY DAY LIFE with JOYCE MEYER Religious Program
5.30AM G TODAY
9.00AM G MALOLO CLUB
Holiday school specials - keep your kids entertained throughout the holiday season.
11.00AM AUSTRALIA NETWORK
2.59PM STATION OPEN
KIDS KONA
3.00PM G MAGICAL TALES
3.30PM G HI-5
4.00PM G THE PYRAMID
4.30PM G THE SHAK
5.29PM G EMTV NEWS UPDATE
5.30PM G MILLIONAIRE HOT SEAT
6:00PM G NATIONAL EMTV NEWS
6.30PM G A CURRENT AFFAIR
7.00PM PG RBT

7.30PM PG RAIT MUSIK
7.27PM EMTV TOK SAVE
8.00PM PG ELITE MUSIC ZONE
8.30PM PG RESCUE SPECIAL OPS (SERIES PREMIERE)
9.00PM PG CRUSOE (MOVIE LENGTH)
10.0PM M 24 - Stars: Jack Bauer
10.30PM G NEWS REPLAY
11.00PM AUSTRALIA NETWORK

FRAIDE, JENUERI 21 2010

5.00AM G ENJOYING EVERY DAY LIFE with JOYCE MEYER Religious Program
5.30AM G TODAY
9.00AM G MALOLO CLUB (FINAL)
11.00AM AUSTRALIA NETWORK
1.00PM G ONE DAY - AUSTRALIA v ENGLAND **LIVE** Venue: Hobart, Tasmania.

4.57PM EMTV TOK SAVE
5.00PM G MILLIONAIRE HOT SEAT
5.30PM G ONE DAY - AUSTRALIA v ENGLAND **LIVE** Venue: Hobart, Tasmania
6.00PM G NATIONAL EMTV NEWS
6.30PM G ONE DAY - AUSTRALIA v ENGLAND **LIVE** Venue: Hobart, Tasmania
9.05PM G CRIME STOPPERS
9.27PM EMTV TOK SAVE
9.30PM PG RPA
10.30PM PG THE GARDEN GURU
11.00PM G EMTV NEWS REPLAY
12.20PM AUSTRALIA NETWORK

SARERE, JENUERI 22 2010

4.59PM AUSTRALIA NETWORK
5.00PM G THE RACING YEARS
5.30PM G MXTV

6:00PM G NATIONAL EMTV NEWS
6.30PM PG AUSTRALIA'S FUNNIEST HOME VIDEO SHOW SUMMER SERIES
7.29PM G EMTV TOK SAVE
7.30PM PG SATURDAY FAMILY MOVIE: HAPPY FEET - (2005) Winner of an Academy Award and directed by Australia's own George Miller. Happy Feet takes us to Antarctica where we meet a young emperor penguin having a hard time attracting a mate. While his friends use their singing skills to attract mates, his song sends potential sweethearts running in the opposite direction. However, he has a gift like no other, he can dance in a way that would make Fred Astaire jealous. Stars Hugh Jackman, Nicole Kidman, Robin Williams and Elijah Wood.
9.30PM PG SUPERSTARS OF DANCE
10.00pm G KING OF QUEENS
11.30PM G N/ EMTV NEWS REPLAY

SANDE, JENUERI 23 2010

6.29AM STATION OPEN
6.30AM G IT IS WRITTEN
7.00AM G HILLSONG
7.30AM.....AUSTRALIA NETWORK.....
1.00PM G ONE DAY - AUSTRALIA v ENGLAND **LIVE** Venue: Sydney Cricket Ground
5.00PM G THE RACING YEARS
5.30PM G ONE DAY - AUSTRALIA v ENGLAND **LIVE** Venue: Sydney Cricket Ground
6.00PM G NATIONAL EMTV NEWS
6.30PM G ONE DAY - AUSTRALIA v ENGLAND **LIVE** Venue: Sydney Cricket Ground
9.05PM M SUNDAY NIGHT MOVIE: ENOUGH. - (2002) Thriller - On the run from an abusive husband, a young mother begins

TORO



BIABIA



KANAGE



TOKWIN

LNG stopim wok...

Multi bilien gas projek Hides long Tari i mekim stop wok long wanem wan tausen papagraun long Tari i go long sindaun long fran banis bilong ol na protes long diman bilong ol. Ol i laikim K10milien na tokim state long 14 de long bekim diman bilong ol. tokwin laik save, husat em ol dispela papagraun long ples na husat em ol dispela papagraun hia long Mosbi husat i pasim Vulupindi haus na diman long kes peimen gavman i mas givim?..Bagarap!!

Suncorp ragbi stedium pulap long wara...

O sori tru ol sapotas bilong kwinsland na Brisbane Broncos. Stedium bilong yupela em olsem bikpela leuk wara long Australia. Sapos yu laik go watsim gem, karim gogol na pisin gan i go long hap. Ating bai yu painim pis long hap. hahahaha!!! Go maroons!!!

Narapela kain sik i kamap gen...

Wanpela ples long Musa long Noten provins Oro i kisim bagarap long narapela kain sik we nau ol dokta na saveman long

glasim sik i go mekim wok painimaut long hap. Ripot i tok eitpela manmeri i dai long dispela sik. Ol i tok bai yu kisim fiva pastaim na lek bai solap, bihain bel bai solap, han bilong yu na taim i go antap long bros na pes na het bilong yu, bai yu dai.

Man, PNG em ples bilong painim kainkain sik. TB,AIDS, Kolera, Malaria, nau em wanem kain sik na planti pipol bai dai long dispela sik. Yumi was tasol long tok-save bilong ol glasman bilong dispela sik.

Tokwin Tasol...

Word search grid with letters T, O, Y, O, T, A, T, L, O, E, R, I, K, U, Z, U, S, R, I, S, E, N, I, P, T, U, J, L, I, B, D, C, E, S, M, K, A, W, A, S, A, K, I, H, K, I, O, L, R, E, I, E, I, A, S, D, R, E, G, E, R, H, A, F, E, N, I, P, R, A, T, R, Y, M, O, N, K, A, S, D, T, E, R, T, S, C, W, I, S, T, S, A, P, E, R, M, N, B, R, A, V, O, E, D, R, I, U, D, M, A, N, S, I, U, N, E, A, R, N, D, P, E, F, S, B, I, K, E, R, O, A, R, I, N, G, I, E, E, A, W, A, S, I, T, P, R, F, O, M, A, S, S, H, S, H, D, I, N, J, A, S, H, E, A, R, I, N, B, L, I, T, C, O, S, A, C, M, Y, H, P, R, I, K, L, Y, U, M, R, U, I, N, B, S, K, L, I, I, P, N, C, H, R, I, S, E, R, G, O, D, L, Y, E, T, T, E, N, A, V, I, L, E, I, J, E, A, R, A, N, D, R, I, F, T, M, S, A, U, S, D, Y, N, A, O, M, I, C, A, L, I, S, M, Y, S, O, R, U, O, F, D, F, I, X, M, E, S, T, E, R, O, N, I, O, A, D, Z, A, M, I, O, V, O, L, K, S, W, A, G, O, N

Painim ol dispela nem bilong kain kain kar na motobak:

Table of car brands: TOYOTA, MAZDA, NISSAN, MITSUBISHI, VANETTE, SPRINTER, HINO, MACK, VOLKSWAGON, KIA, MERCEDES, FIAT, KIANG, HONDA, KAWASAKI, SUZUKI, SUBARU, FORD, BRAVO, AUDI

4x4 grid for Ansa bilong las wik Sudoku. Grid contains numbers 1-9.

9x9 grid for Ansa bilong las wik Sudoku. Grid contains numbers 1-9.

Ansa bilong las wik Sudoku

Ansa bilong las wik Pasol

Word search grid with letters T, S, T, O, R, I, T, U, M, B, U, N, A, U, U, P, T, I, T, B, I, L, O, N, G, F, I, K, R, M, I, S, A, I, M, H, G, R, N, T, A, A, N, A, E, S, B, A, D, G, E, M, P, L, U, P, A, R, N, I, K, S, N, A, M, G, T, A, S, A, A, R, E, T, K, L, A, K, P, U, O, S, G, N, I, S, B, N, I, S, P, E, N, I, M, S, K, I, N, L, D, A, U, S, E, L, K, A, M, B, A, N, G, R, U, M, A, T, I, R, A, M, P, I, L, G, U, S, A, L, I, B, L, K, A, N, G, A, L

EMTV Television Guide

Television guide table with columns for time, channel, and program name. Includes programs like NATIONAL EMTV NEWS, THE PYRAMID, TOK PIKSA, etc.

Ol Progam na Taim i ken senis...

Raun wantaim Kanage olgeta wik

Rough! Rough!

Amerika na wanpela Papua Niugini pikinini, tupela i pilai long gras stap na skin blong tupela i sikarap. Papua Niuginian kirap na tok inglis long Amerikan olsem, "Yu Rough me first, then I rough you. Together we rough rough".

Tupela Marit

Tupela marit stap longpela taim na man igo marit wantaim wanpla niupela meri. Ino long taim ol i painim aut Na putim tupela long kot. Taim kot i askim tupela, tupela i Yes! Ino long taim nambawan meri kirap Na tok, "Mi wanbel long tupela wokim, tasol mi laikim plastik contena wara blong mi mas karim i kam long mi yet".

Masol man

Wanpela bun kakaruk man pikinini kirap na askim bata blong em.



Olsem wanem long ol man i save bikpela na masol man nambaut ya? Bata blong em kirap na bekim olsem, "Ol save dringim planti sup". Dispela pikinini ya harim na olgeta taim em ino save westim long dringim sup. Olgeta taim em save mekim olsem na wanpela taim em tok long em yet olsem, "Man ating ol sup mi wok long dringim ya inogat gris long en olsem pik blong Sepik". Sapos pik blong Hailans em mi masol man nau!

Kanage paitim Pikinini

Wanpela taim, pikinini bikhet na papa Kanage paitim em. Pikinini wari na karai i stap na sem taim poroman bilong Kanage i kam long lukim papa Kanage. Em i lukim pikinini bilong

Kanage i sindaun long varanda blong haus na karai i stap. Em i askim, papa i stap ah? Seken taim gen em i askim, papa stap ah? Nogat bekim, pikinini bisi long karai i stap. Namba tri taim gen em askim pikinini, papa blong yu Kanage i stap ah? Pikinini karai wantaim na singaut long papa, Papa! Papa! Papa Kanage bekim na tok, wanem ya pikinini yu tok. Papa, man blong yu kam long lukim yu oh. Pikinini tokim papa Kanage, Kanage belhat nogut tru kam long paitim pikinini nogat, em i lukim poroman gen na em pilim sem.

Ol skwat!

Salim ol gutpela Kanage

tok pilai i kam long:

Kanage Tok Pilai

P.O. Box 1982,

Boroko, NCD

Port Moresby.

Email: atolire@wantok.com.pg

Man bilong mi i raun wantaim marit meri

Dia Laiplain

MI MARIT long 10-pela yia, na mi gat tupela naispela pikinini. Mi na man bilong mi em mitupela ol Kristen lain. Mi wok long glasim man bilong mi stat yet long mitupela i marit na long namba 5 yia bilong marit, mi painimaut olsem em i wok long paul wantaim wanpela marit meri.

Wanpela taim, mi bungim dispela meri long opis bilong em na mitupela i pait. Bihain long dispela, mi bin ting olsem tupela i stopim paul na raun pasin, tasol nogat. Mi harim ol stori olsem tupela i poroman paul raun yet. Insait long 5-pela yia, man ya i wokim planti samting long dispela meri. Meri ya bai lusim man bilong mi o?

Worried about my children

Dia Pren,

TENKYU long serim wari bilong yu wantaim mipela. Mipela i sori long kain hevi olsem yu bungim long en. Yutupela marit em ol Kristen na yu wok long mekim samting long traim stretim hevi i kamap long marit laip bilong yu.

I gutpela olsem yu wok long traim mekim samting long stretim wari na hevi bilong yu. Taim ol man i komplek na i no mekim samting long stretim wari o hevi, hevi bai stap yet na i ken go bikpela sapos ol i lusim olsem i stap. Taim manmeri i luksave olsem i gat hevi i stap na mekim samting long



stretim, ol i kamap papa bilong hevi o wari we ol i mas lukim olsem ol i stretim.

Pren, mipela i bilip olsem yu bin traim long toktok wantaim man bilong yu long dispela hevi tasol yu no tokim mipela em i tok wanem. Sapos yu no tokim ol papamama bilong yu long dispela samting, i moabeta yu tokim ol na ol ken helpim yu long dispela hevi yu gat long en. Na ol lotu pren bilong yu? Yu ken toktok long sios pasto o ol gutpela marit lain we i ken givim yu gutpela stia na toktok.

Marit bilong yu i gat luksave long ol loa bilong yumi long kantri olsem sios, sivil na gavman o kastom pasin?

Hevi long paul pasin namel long ol marit lain long dispela kantri i wok long go bikpela na em i wanpela bikpela samting we yumi mas klia long en. Yumi save olsem i gat planti mama na papa we i bungim dispela hevi, tasol ol i no toktok. Ol stap isi na karim hevi ol yet. Sampela i mas tingting long nem na luksave ol i gat long en, sampela i pret long ol man bai paitim ol nogut, sampela i pret olsem dispela samting bai kamapim sem long ol, sampela i gat mani hevi, sampela ol pikinini na planti moa.

Yu ken kisim Ristrening Kot Oda long man bilong yu na dispela marit meri sapos ol i wok long pren na paul

wantaim yet.

Laiplain i save promotim helti na marit we i gat amamas long en. Sampela taim, wanpela i mas sanap strong na wokim samting long kamapim senis na stretim hevi olsem dispela yu gat long en.

I moabeta yu lukluk gut long rot yu bihainim long stretim hevi yu gat long en. Long kamapim hevi, tupela lain wantaim insait long en. Watpo na dispela hevi i kamap? Em i stat olsem wanem? Sampela ol samting em yu yet i mas askim yu yet na ansaim ol.

God i God bilong laik pasin na kamapim bel isi pasin. Em i gat intes o laik long laip na welfea bilong yu. Go long God bikos em i laikim yu. Ritim Matyu 11: 28 na Romens 8:28.

Ringim mipela long namba 3260011 long kisim moa stiatok o kam long opis bilong mipela na yumi ken toktok na yu ken kisim kaunseling tu.

God i ken givim yu bel isi na gutpela tingting.

Pren bilong yu

Laiplain

Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

Laiplain



NEM: Philipi Jonathan Hiwaye

KRISMAS: 19 (man)

DRES: C/O New Tribes Mission, P.O.Box 1079, Goroka EHP

SAVE LAIKIM: Pilai soka, mekim pani, raun long bus, fising, raitim pas na lukim niupela ples

NEM: Yasling Noeno

KRISMAS: 18 (man)

ADRES: Kotidanga Primary School, P.O. Box 117, Kerema, Gulf Provins

SAVE LAIKIM: Pilai volibol, stori, painim abus long bus, harim musik, go Lotu na ridim ol buk.

NEM: Boldon Suko

KRISMAS: 23 (man)

ADRES: Kilipau Village, P.O.Box 96 Vanimo Sandaun Provins

SAVE LAIKIM: Pilai volibol, pilai soka, raitim pas na senisim Presen.

NEM: Benard Wai

KRISMAS: 22 (man)

ADRES: Kilipau Village, P.O.Box 96 Vanimo Sandaun Provins

SAVE LAIKIM: Pilai Soka, senisim presen, raitim pas na mekim pren (Painim Meri long maritime)

NEM: Ben Iwi

KRISMAS: 27(man)

ADRES: Kilipau Village, P.O.Box 96 Vanimo Sandaun Provins

SAVE LAIKIM: Pilai soka, volibol, raitim pas na senisim presen.

NEM: Belden Wangu

KRISMAS: 20 (man)

ADRES: Kilipau Village, P.O.Box 96 Vanimo Sandaun Provins

SAVE LAIKIM: Senisim presen, raitim pas, harim musik, mekim Pren na painim meri wanpela long maritim.

NEM: Augustine Pinu

KRISMAS: 18 (man)

ADRES: Kilipau Village, P.O.Box 96 Vanimo Sandau Provins

SAVE LAIKIM: Raitim Pas, harim musik, senisim presen na pilai soka

NEM: Sheena Dogbatse

KRISMAS: 26 (meri)

ADRES: U.C.C. Cape Yars, P.O. Box UC- 340 U.C.C central/ Reg, Ghana West Africa. Phn: 00233 - 2750 - 82973

SAVE LAIKIM: Mekim Pren, senisim presen, go Lotu, raun na painim haus man long maritim na stap gut oltaim.

NEM: Paul Telape

KRISMAS: 20 (man)

ADRES: The University of Papua New Guinea, Mt Hagen open Campus, P.O. Box 90, Mt Hagen Western Highlands Provins

SAVE LAIKIM: Pilai rakbi, basket bol, volibol, stori long tumbuna na pani storis, pilai gita na arapela musik, go Lotu na mekim Joke.

NEM: Monita Raio

KRISMAS: 21 (meri)

ADRES: Lae Ever Clean, P.O. Box 167 Konedobu, NCD. **SAVE LAIKIM:** Go Lotu, raitim leta, harim musik, pilai bol gem, swimming, gardening, singing, kuing, londri, riding buklet, pilai gita, mekim pren, sharing, luk afta haus utensils na foldim kolos

Somare amamas long toktok bilong Kroton No. 2



GAVMAN i gat bilip long nupela bod bilong Kroton No. 2 long ol bai menesim gut mani bilong kantri long taim PNG Likuafaid Netural Ges (LNG) projek i kamap.

Minista bilong Pablik Entaprais, Arthur Somare, i tokaut long tingting bilong gavman long taim Siaman bilong Bod, Kerenga Kua, i tokaut long wok kamap bilong kampani wantaim PNG LNG projek i no longtaim i go pinis.

Em i hop olsem long 2014 PNG bai stat long salim ges long LNG projek na PNG yet i gat 19.6 pesen sea long dispela projek.

Mista Somare i tok gavman bai makim olgeta memba bilong bod bihain long em i kamap loa bilong stap bilong Kroton No. 2.

Em i tok Kua husat i loya i gat inap save long lo na moa yet long wok bilong maininig na petroleum sekta na Kroton No. 2



KUA: Laik mekim wok gut.

long stat bilong kamap bilong em bai ron gut aninit long lukaut bilong em.

Em i stap olsem namel man wantaim ExxonMobil, kampani we i developim LNG projek, na gavman.

Em i tok long kamap bilong projek gavman na ExxonMobil bai mekim ol samting we bai lukim ol i no bungim hevi bilong pulim bek taim bilong pinis bilong konstraksen i go long taim bilong salim.

Kroton bai was gut long kamap bilong projek na bai mas lukluk long ol toktok bilong papagraun na mani bilong ol long mekim bisnis i kam long Bisnis Developmen Gren o sid kapital (mani).

Nupela bod nau i

gat Kua olsem Siaman, Ekting Seketari bilong Dipatmen bilong Pablik Entaprais, Mathias Lasia na wanpela mausman bilong Tresari Dipatmen, Igimu Momo olsem dairekta.

Kua i bilong Kundi, na i presiden bilong PNG Lo Sosaiti stat long 2003 na i stap olsem Deputi Siaman bilong Nambawan Supa na Siaman bilong Fainens Koporesen.

Em i bin bipo Menesing Patna wantaim Posman Kua Aisi loa kampani we i wok moa long sait bilong Komasel Litigesen stat long 1993 i kam inap long Jun, dispela yia.

Olgeta memba bilong bod em gavman

pela taim long bihain.

Gavman i makim sampela moa ol opisa long ol papagraun grup na provinsel gavman husat inap long mak bilong sea i go antap long 25.75 pesen long ol toktok bilong Benefit Searing Agri-men long 2009.

Dispela ol man em Dairi Vele, Interim Sif Eksekutiv Opisa; Brian Rapson, Sif Opereting Opisa; Geoffrey Emang, Jeneral Kaunsel na Pertusio Kapital Patnas olsem Stratejik Edvaisa.

Vele bipo i wok olsem Projek Dairekta wantaim Ges Projek Kodinesen Opis na i statim wok bilong em wantaim Kroton No. 2 long 11 Oktoba, 2010.

ANZ PNG lonsim nupela bilas

ANZ Benk long Mande 17 Januari, 2011 i lonsim nupela eksekutiv bilas o kolos bilong em we i soim ol samting bilong Pasifik.

Dispela bilas em ol i wokim long Papua Niugini i wanpela hap bilong bikpela tingting ol i gat long bringim ol wok manmeri bilong em long 32 kantri we ol opis bilong em i stap.

Maski long ol arapela kantri, long ol eksekutiv bilong PNG, em kain bilas bilong Pasifik ol i gat long em.

Long bilas i gat ol siot, sulu na lavalava.

Long dispela CEO PNG na Pasifik Not Wes Rijen, Vishnu Mohan i tok: "Long namba wan taim histori bilong ANZ, ol wok manmeri bilong mipela long hia long PNG bai putim bilas wankain olsem ol wok manmeri bilong mipela long ol arapela hap bilong Pasifik rijen na sapos nogat olsem long ol arapela rijen.

"Long ol kastoma, dispela i min maski wanem kantri ol i makim long go long em, ol inap long luksave long ol wok manmeri bilong ANZ isi."

Mekim bilong nupela bilas i bihainim lonsing bilong namba wan lonsing ol i mekim long las yia.

Ol wok manmeri bilong Pasifik,



LAIKIM: ANZ PNG Ilektronik Benking Tim i kisim malolo na soim nupela bilas bilong ol.

we i kisim tu PNG i givim tingting bilong ol long wanem samting ol i laikim long mekim bilong ol bilas.

Na mekim bilong dispela ol kolos i bihainim tingting bilong ol.

Ceslie Ume-Ila, memba bilong ANZ Humen Risoses Tim i tok ol wok manmeri i amamas long soim dispela nupela bilas bilong ol long ol kastoma.

Em i olsem man i pulim gutpela win, ol wok manmeri bai amamas long putim dispela nupela bilas bilong ol.

Dispela bilas i soim mipela i husat.

Maski dispela bilas i olsem unifom bilong wok, i gat planti kain stail bilong wanpela unifom, we i mekim mipela i olsem narapela long ol arapela, Ume-Ila i tok.

Nupela ANZ bilas i gat olsem moa long 65 ol hap, givim taim

long ol wok manmeri long putim unifom bilong ol.

Wanpela bilas i ken tanim wantaim ol arapela tasol i no inap long paul namel long ol arapela taim em i mekim olsem.

Long kisim ol samting na mekim bilas bilong 13,000 wok manmeri bilong em i min kampani i yusim olsem 38,000 zips na moa long 1 milion baton.

Lonsing bilong tude i bihainim lonsim we PNG Minarel Risoses Atoriti Onlain Stua i kamapim long ANZ eGate.

Dispela sistem i helpim MRA long kisim ol samting bilong em.

ANZ i gat 500 wok manmeri long PNG, i gat 13 brens, 50 ATM na moa long 500 bisnis haus o kampani we ol i gat 900 teminel na EFTPOS bilong em.

Ramu NiCo laik kamapim Sios-Praivet sekta poroman

RAMU Nikel kampani (NiCo) o MCC Limited i wok long painim ol rot bilong kamapim Sios-Praivet poroman wok long developim Madang Provins.

Dispela i kamap long taim Ramu NiCo Presiden, Madam Luo Shu, i go lukim hetman bilong Luteran Sios long Madang, Matthias Knock, long las wik Sande.

Madam Luo i go long moning lotu na bihain i go bung wantaim ol lidaman na manmeri bilong sios.

Wantaim Knock em Pasto Daniel Wang we Madam Luo i bungim ol.

Bihainim dispela bung olgeta wantaim i go long kamapim Sios-Praivet Sekta Patnasip long

kamapim developmen.

Madam Luo i tok em i as tingting bilong kampani na olsem kampani bai yusim olgeta rot long kamapim ol samting i kamap tru.

Wokabaut bilong Madam Luo i bihainim pastaim wokabaut bilong kampani taim ol haus sik wok manmeri bilong em olsem Dokta Yang Yan i go aut na mekim wok namel long ol memba bilong Luteran Sios.

Ramu NiCo Presiden Asisten Duan Jiubin, Dokta Yan na Komunuti Afeas mausman Jerico Pan i go wantaim Madam Luo long las Sande wokabaut.

Ramu NiCo Menesmen (MCC) Limited i menesa bilong Ramu Nikel na Kobalt main long Madang Provins.

PNG gat gutpela graun bilong wok gaden

PAPUA Niugini i gat bikpela na gutpela graun long mekim gaden na kamapim ol arapela samting long pulim ol investa i kam insait long kantri.

Gavman i mas wok hat tu long promotim invesmen i go insait long agrikalsa sekta.

Tasol wantaim long dispela em i mas gat gutpela infrastraktsa olsem ol gutpela rot na bris na gutpela lo na oda long komyuniti.

Olgeta dispela samting i bikpela samting long mekim kantri i kamap gut.

Hetman bilong Saina tim Lin Rentong i mekim dispela tok long taim em i givim tok long ol opisa bilong Dipatmen bilong Agrikalsa na Laipstok long sampela taim i go pinis.

Em i tok em i amamas long lukim planti hap bilong kantri inap long kirapim ol bikpela agrikalsa projek na i bilip PNG wanpela de inap kamap develop kantri olsem Saina.

Em i tok long mekim olsem PNG i mas yusim ol risoses bilong em wantaim nupela teknoloji wantaim helpim i kam long ol gutpela na trupela investa.

PNG i gat gutpela taim (klaimet) long mekim graun i stap gut long kamapim wok agrikalsa.

Na dispela ol samting i kisim wok bilong planim rais na grein tu.

Tasol PNG i mas kamapim gutpela infrastraktsa olsem trenspot, rot, ol maket, wara, pawa long lukim agrikalsa na ol arapela sekta i kamap bikpela.

Mista Rentong husat i Deputi Dairekta Jeneral bilong Liaoning Provinsel Faming na Len Riklemesin Beru (Bureau) i go pas long Saina tim long kam long lukluk raun long kantri long painim ol rot bilong mekim invesmen.

Tripela de wokabaut bilong em na tim bilong em i kisim ol i go long Vanapa, Hiritano Haiwe, Sentral provins long luksave long ol samting kantri i gat long ol i ken mekim invesmen.

Long dispela taim tu ol i bin toktok wantaim ol kampani i stap long kantri.

Em i tok Saina i redi long helpim PNG long ol nupela faming teknoloji na givim trening long ol PNG manmeri long kisim save na yusim ol dispela samting.

Bikpela samting em olsem PNG i mas redim graun long ol kampani i kam insait.

Long bekim Seketari bilong DAL Anton Benjamin i tok PNG nau i painim ol sans long di-



GUTPELA GADEN: Ol opisa bilong Saina i sekim kon gaden long Doa, Hiritano Haiwe, Sentral Provins.

velopim agrikalsa sekta bilong em na kam bilong Saina bai moa gutpela.

Mista Benjamin i tok PNG i gat ol sans bilong kamapim grein prodaksen, laipstok na ol ara-

pela dawai krop olsem kopi na kokonas long apim mak bilong salim ol samting bilong wok didiman.

NARI pasim han Sunshine long developim jatropa long PNG

Udai Pal (NARI) i raitim

NESENEL Agrikalsa Risets Institut (NARI) i pasim tok wantaim ShineSun (PNG) Limited long mekim wok painim na trening i go insait long developim Jatropa long Papua Niugini.

Long mekim olsem tupela i bin sainim wanpela Memorandum bilong Agrimen (MoA) long Mosbi i no longtaim i go pinis.

Dispela saining i lukim Dokta John Kola husat i makim NARI na Ken Yuan Chieu Cheng i jeneral menasa bilong ShineSun Limited, a Taiwanese investa i sainim dispela MoA.

Dispela MoA em NARI Dairekta Jeneral Dokta Raghunath Ghodake, wanpela mausman bilong Taiwan Embasi, ol opisa bilong ShineSun Limited, opisa bilong Dipatmen bilong Agrikalsa na Laipstok na opisa bilong NARI long Sauten Rijenal Senta (SRC) long Laloki ausait long Mosbi.

As tingting bilong dispela MoA em:

- MEKIM wok painim long Jatropa (Jatropa karkas) na givim trening long ol fama long ol i planim Jatropa long PNG;

- SKELIM graun na ol samting long NARI Laloki long ol i mekim wok painim long Jatropa na developim Jatropa long kantri;

- LONG save ol i kisim NARI na ShineSun Ltd bai serim dispela save wantaim ol fama long PNG;

- LONG lukim olsem taim ol fama i kisim save ol i ken mekim Jatropa olsem samting ol i laik yusim long strongim laip bilong ol na salim na kisim mani long em na

- LONG NARI na ShineSun Ltd i bihainim tingting bilong mekim wok painim na givim trening long ol fama we tupela i ken helpim long kamapim Nesenel Jatropa Teknikol Stiarng Komiti bilong developim Jatropa Baiofiul Projek long PNG.

Rot bilong kamapim baio-fiul em long painim ol samting we i no dia tumas long ol fama i ken kisim isi na developim.

Jatropa i wanpela bikpela samting long kantri we i ken sapotim laip bilong ol fama.

Ol saveman i painim olsem Jatropa i wanpela gutpela samting long kamapim baio-fiul na em i ken kisim ples bilong disel.

NAIS bikpela samting long developim agrikalsa sekta

Busisi Siwaka (DAL) i raitim

PAPUA Niugini Agrikalsa Infomesen Sistem (NAIS) i bikpela samting long strongim na developim agrikalsa sekta long kantri.

Stat long taim em i kamap long 1991 NAIS i bin wok bung wantaim Nesenel Agrikalsa Risets Institut (NARI) na PNG Kopi Risets Institut (nau hap bilong Kopi Industri Koporesen- CIC).

Wantaim dispela tupela oganaisesen NAIS i laik surukim wok bung bilong em i go moa wantaim ol arapela oganaisesen tu.

Nau long dispela taim ol arapela



grup we em i wok bung wantaim em Dipatmen bilong Agrikalsa na Laipstok, Ramu-Agri Indastris, Nu Britan Pam Wel Ltd, PNG Well

Pam Risets Asosiesen na PNG Kakao Kokonas Institut.

Narapela tupela institut, PNG Yunivesiti bilong Teknoloji na PNG Forestri Risets Institut, bai join long liklik taim.

NAIS i gat inap olsem 36,000 rekod bilong buk, jonel, konferens pepa, traim ripot na ol arapela toktok long laibreri catalog bilong em.

Manmeri i ken yusim data bes bilong DAL long Infomesen Brens i stap long Monian Tawa long daun-taun Pot Mosbi.

Long save moa long dispela ol pepa manmeri i ken ringim Sif Infomesen opisa Nicks Maniha na

sinia laibreri opisa Gabriel Yange long telepon namba 340 2108.

Long wankain taim DAL infomesen Brens wantaim teknikal Senta bilong Agrikalsa na Rurel Koporesen (CTA) i go moa long kisim wanpela infomesem booklet bilong "Essentiel Elektronik Agrikalsa Laibreri (TEEALO).

Dispela samting em ol i mekim long Albert R. Mann Laibreri long Cornell Yunivesiti long Amerika.

TEEAL na i stap long op lain we ol pepa bilong em i stap long pdf fail long 130 jonel stat long 1993 i kam.



PRESIDEN: David Chung (namba tu man long raithan) i sanap holim laplap bilong FIFA wantaim Presiden bilong FIFA, Joseph S. Blatter long Tonga las wik. Ol i makim Chung olsem namba tu bilong Blatter, na em i kisim wok tu olsem



EM YA: Geua Raula bilong Telikom i tromoi bal i go long wanpilai bilong em long gem bilong ol agensim Finance insait long Pablik sevents netbol resis long Mosbi las wik Sarere. POTO: Andrew Molen.



PUTIM HAN: Gol Kipa (GK) bilong Fairdeal i traim long pasim Gol Suta (GS) bilong Brian Bell long noken putim gol long gem bilong ol insait long Praivet Kampani netbol resis long Mosbi las wik Sande. POTO: Andrew Molen.



TASIM: Pilaia bilong Poreporena i tasim mak wantaim bet long hariap tasol long ron i go bek long Mosbi kriket resis bilong ol meri las wik Sande taim ol i pilaim Taora. POTO: Andrew Molen.

HOM: Nerius Kua bilong Bears i silip aninit long lek bilong ketsa bilong Dolphins taim em i ron i kam kalap long hom bes bipo long ol i autim em. Dolphins i bin win 7-5 long dispela gem bilong ol man long Mosbi soffbol resis long Sande las wik.

Gem bilong ol longpela man

PLANTI save tok basketbol em i gem bilong ol longpela man tasol.

Dispela tok em i no tru bilong wanem ol sotpela man o meri tu i ken pilai.

Tasol dispela toktok i kamap bilong wanem ol longpela man i save painim isi moa long pilai basketbol bilong wanem ring bilong kisim skoa i antap tru na ol longpela man i ken kalap o apim han bilong ol tasol long putim bal i go insait.

Ol sotpela man tu i gat stail bilong ol long pilai basketbol na salens bilong ol dispela pilai i save mekim dispela i wanpela gutpela gem long lukim tu.

Basketbol i kam long we?

Basketbol i bin stat long Disemba 1891 taim wanpela spots saientis, Dokta James Naismith bilong Kanada (Canada) i painim rot long kamapim wanpela gem bilong ol sumatin bilong em long Springfield, Massachusetts long Amerika we ol i ken pilai insait long bikpela haus long taim bilong kol na ais i pundaun outsait.

Em i bin raitim ol lo na stail bilong pilai bilong ol sumatin bilong em long "International Young Men's Christian Association Training School" (YMCA).

Bihain long em i raitim ol loa na stail bilong pilai, Dokta Naismith i kisim wanpela basket bilong putim apel na i nilim long wol olsem ring bilong tromoi bal i go insait long skoa.

Tasol em i no bin rausim as bilong dispela basket taim wanpela i skoa, ol i mas go antap na rausim dispela bal i kam daun long pilai gen.

Bihain taim, ol i mekim hul aninit long en na i save sutim bal i kam aut gen w a n

senisim dispela basket wantaim ring stret we ol i mekim wantaim ain na i putim bikpela hap diwai bod long baksait bilong en olsem ol basketbol ring bilong yumi tete.

Ol i mekim ring i go bikpela liklik tu we bal i save pundaun i kam aut long aninit taim wanpela i tromoi bal i go insait long o i skoaim wanpela "basket".

Gem i stat long wantaim ol man pastaim na long 1892, basketbol bilong ol meri kamap.

Namba wan ofisol baskebol gem tru i kamap long Januari 20, 1892 wantaim 9-pela pilai na skoa i bin 1 - 0.

Ol i bin pilai long wanpela kot we i hap sais bilong ol basketbol kot tete.

Namba bilong ol pilai long wanwan tim i senis namel long 1897 na 1898 i go long 5.

Olgeta YMCA skul long Kanada na Amerika tasol i pilai basketbol na long 1895 gem bilong ol merit u i kamap strong.

Tasol bihain, YMCA i tambuim ol yet long pilaim dispela gem bilong wanem ol i lukim olsem em i kamap strong na planti pait na kros i save kamap namel long ol pilai na sapota.

Ol i stop tasol ol arapela skul, kolis na asosiesen i kisim dispela spot na pilaim long ol ples bilong ol.

W a n w a n asosiesen i kamap na

i bung long lukautim na ronim gut gem, was long ol pilai na ol lo na stail bilong pilai.

Gem i go bikpela bipo long namba wan wol woa i kamap na i gro moa yet bihain long woa i nap long nau we i wanpela profesenol spot.

Stail bilong pilai

Basketbol em i gem we tupela tim i save pilai, wanwan tim i save gat 5-pela pilai na tupela refri save lukautim gem.

Ol i save pilaim dispela gem wantaim wanpela bal we ol pilai i mas tromoi go daun long gaun na kisim gen taim em i kalap i kam bek antap long han bilong ol.

I tambu long karim bal na ron wantaim o long paitim bal i go daun long graun wantaim tupela han

wantaim.

I tambu tu long holim pasim o pusim nara-pela pilai long traime na kisim bal.

Pilai graun bilong basketbol em kot, na i ken i stap outsait o insait long haus.

Long skoa o kisim point, wanpela tim i mas traime long kisim bal i go na tromoi go insait long ring bilong narapela tim husat bai traime long pasim na rausim bal long ol.

Taim bal i go insait ring em "basket", wanpela basket em tupela poin.

I nogat planti samting bilong werim long pilai tasol em i gutpela long ol pilai i mas putim ol gutpela slu bilong pilai antap long kot bai ol i noken wel na pundaun na tu kot bai kot i noken bagarap.

Sampela i save putim ol sapot long lek na han skru bilong ol tu long was tasol sapos ol i pundaun bai ol i noken kisim bagarap.

Basketbol long Papua Niugini.

Basketbol i kamap long PNG long 1970's na i go strong namel long 1980's na 1990's.

Em i save kamap strong long NCD, Sentral, Morobe, Madang, antap long Hailans, Galp na Oro provins.

Basketbol i wanpela spot we planti ol yangpela manmeri tu i save amamas long bung na pilai long skul, strit o baksait long haus bilong wanwan.

Dispela spot i no kamap profesenol yet long PNG tasol i gat planti gutpela klap na pilai i kamap long en insait long kantri.

PNG Basketball Federation (PNGBF) i save lukautim ron bilong olgeta asosiesen long kantri na nesanel sempionsip i save kamap olgeta ya.

Long hap ol i save makim ol pilai bilong makim kantri long ol bikpela tonamen ovasis olsem Pasifik Gems na ol arapela we PNG i kwalifai long go pilai long en.

Sampela ol pilai bilong PNG husat i kisim nem long dispela gem em Maurice Elavo, husat i dai pinis, Lawrence Lahari, Stoney Elavo, Charles Paraha na ol arapela.

Bikpela na olpela basketbol asosiesen stret long PNG em "Capital Basketball League" (CBL) long Mosbi.

Bikpela gem

Basbektbol em i bikpela gem long planti ol bikpela kantri long wol olsem Australia,

Amerika na Siapan (Japan).

Gem i kamap profesenol long ples bilong ol we ol i save lukautim gut ol pilai bilong ol na tub aim ol long bikpela mani.

Dispela ol pilai i save kisim nambawan trening na ol samting long lukautim ol gut bai ol i ken pilai gut bilong tim bilong ol.

Em i kamap olsem wok mani bilong ol pilai husat i no kisim gutpela skul o trening bilong painim wok.

Bikpela gem long Amerika we planti manmeri save bihaim em "National Basketball Association" (NBA).

Ol i gat ol biknem tim olsem LA Lakers, Chicago Bulls, Orlando Magic na ol arapela.

NBA em i namba wan na bikpela basketbol resis moa long ol arapela long wol, ol i save baim moa mani long ol pilai bilong ol, i gat ol gutpela moa pilai, na strong bilong gem long hap i bikpela moa tu.

Dispela gem i kamapim ol biknem pilai olsem Earvin "Magic" Johnson, Larry Bird na Michael Jordan.

Basketbol em i gutpela gem bilong pilai na malolo tasol sapos yu no laik ron i go i kam, kalap o hatwok long mekim planti samting.

Yu ken sanap tasol na traime long tromoi bal i go insait long "ring" o basket.


Astingting long kamapim dispela gem em long pilai insait long haus taim ren na ais i pundaun o bikpela kol i kamap outsait.

Yu ken hatim skin na ekseisais insait long haus long dispela kain taim we em i hat long go outsait na mekim wanpela wok o pilai wanpela gem.


PILAI GRAUN: Sais bilong kot (antap) we ol basketbol gem i save kamap long en.

KALAP: Stail bilong Jordan (lep) long kalap antap tru i givim em ninknem olsem "Air" Jordan.

BIKNEM: Johnson em i binwanpela biknem pilai bilong LA Lakers long NBA



BASKETBALL



taim wanpela longpela hap diwai. Long 1906, ol i

Yellow kad stopim Emerton

NAMBA tu yelo kad Brett Emerton i kisim long Asian kap resis las wik bai lukim em i no inap pilai bilong Australia long kwata fainols gem bilong ol.

win bilong ol agensim Bahrain i givim ol namba wan ples long grup C we i putim ol antap

long Saut Koria husat i narapela strongpela tim long dispela grup.

Emerton i kisim kad taim refri bilong Siapan, Yuichi Nishimura i lukim em i holim siot bilong narapela long mid-fil long 41 minit bilong gem.

Em i givim fri kik long ol na yelo kad long Emerton.

Emerton i tok long ol nius ripot bihain olsem dispela em liklik samting na i nogat as long ol i givim yelo kad long em.

"I gat ol arapela bikpela salens i kamap insait long gem tasol refri no mekim wanpela samting," em i tok.

Em i tok refri nap long givim fri kik tasol na em i nap, dispela yelo kad i nogat as bilong en.

Tasol em i tok i nogat rot nau na em bai kisim dispela saspensen tasol na wet long pilai long semi fainols sapos tim bilong em i go insait.

Long wankain taim, Australia i wok long putim ai long



SASPENSEN: Emerton bai no nap pilai.

straika, Tim Cahill husat i kisim bagarap long leplek bilong em.

Kosa, Holger Osieck i tok Bahrain i givim ol strongpela la gem tru na em i no wanpela


isi win.

"Mipela i pait hat tru long dispela gem tasol i gutpela

long mipela i pinis namba wan ples long grup bilong mipela," em i tok.

Souths lusim wanpela moa pilaia

BIKNEM: Tupela pilaia i lusim Souths long mekim spes bilong Inglis.



WOK bilong Souths Sydney long winim Greg Inglis i stap wantaim ol, i lukim ol i lusim wanpela moa pilaia.

Beklain pilaia, Jamie Simpson i lusim ol na i sainim wanpela kontrak long pilai wantaim Huddersfield Giants long Supa Lig resis long Inglen.

Simpson i bihainim Beau Champion husat i go long Melbourne Storm, long mekim spes bilong Inglis.

I gat 10-pela mun i stap yet long kontrak bilong Simpson long Souths tasol ol i lusim em i go hariap bai Inglis i statim sisen wantaim ol.

Simpson i pilai 37 gem wantaim Souths insait long tripela yia na i tok em i amamas long go pilai long Inglen.

"Em i gutpela sans bilong mi long pilai ragbi lig long narapela kantri na lukim ol arapela ples long wol tu," em i tok.

"Mi amamas tu long ol Rabbitohs long givim mi sans long pilai wantaim ol long las tripela yia," Simpson i tok.

Sif Ekskyutiv Opisa (CEO) bilong Souths, Shane Richardson i tok amamas long Simpson long helpim bilong em long Souths insait na autsait long pilai graun wantaim.

"Em i gutpela sans bilong em long kisim dispela kontrak long Inglen we em bai nap long lukim ol arapela kantri na tu pilai ragbi lig long hap," em i tok.



BIKMAN: Chung (raithan) i sanap wantaim Blatter bihain long ol i makim em las wik. POTO: OFC.

PNG man em namba tu bilong FIFA

DAVID Chung i kamap namba wan Papua Niugini man long kamap namba tu bilong wanpela bikpela intanesenel spots ogenaisesen long wol.

Chung i winim dispela wok taim ol i makim em olsem Presiden bilong Oceania Football Confederation (OFC) long Pago Pago, Ameriken Samoa.

Olsem presiden bilong OFC, dispela i mekim Chung i kamap tu olsem vais presiden bilong FIFA.

11-pela memba bilong OFC i bin kamap long dispela bung taim ol i vot we Presiden bilong FIFA, Joseph S. Blatter i bin stap na lukim.

Carney no nap pilai 8-pela wik

2010 i bin gutpela yia bilong Roosters faiv eit, Todd Carney, we i lukim em i winim tu Dally M awod olsem nambawan NRL pilaia.

Tasol 2011 sisen bilong em bai no inap stat gut olsem las yia.

Dispela i kamap bihain long ol wok glasim bilong dokta i painim olsem em i mas kisim operesen long wanpela bagarap long sangana bilong em.

Carney i kisim operesen long Trinde dispela wik na bai no inap pilai 8-pela wik olgeta.

Em bai no inap pilai long olgeta trail gem bilong Roosters long pri sisen na i mas wokhat long kamap fit gen long go insait long tim long kik of bilong NRL sisen long Mas we ol bai pilaim Souths Sydney.

Carney bai no inap stap insait long All Stars gem long Skilled Park long Februari 12 tu.

Ol arapela husat bai no inap stap insait long dispela gem tu em Greg Inglis, Billy Slater, Sam Burgess, Luke Lewis na Greg Eastwood.



BAGARAP: Carney bai no inap pilai 8-pela wik.

Stuart luksave long ol Blues pilaia

LONG taim lok fowet bilong Canberra, Alan Tongue na Souths winga, Nathan Merritt i save pilai gut na planti toktok i save kamap olsem ol i mas go insait long Stet ov Orijin tasol ol i no save kisim ol.

Tongue na Merritt i gat sans nau aninit long nupela Blues kosa, Ricky Stuart husat, i makim ol pilaia pinis bilong redi long Stet ov Orijin dispela yia na tu long ol yia i kam.

Dispela skwat i gat ol NRL pilaia na ol anda 20 pilaia long ol junia divisen husat Stuart i bilip bai mekim nem long Stet ov Orijin bihain taim.

Wanpela trening kem bilong dispela skwat bai kamap long Januari 21 i go long 23 long Homebush long Sidni (Sydney).

Mal Meninga i bin mekim wanpela developmen wok wantaim ol Maroons taim em i bin go insait olsem kosa bilong Queensland namba wan taim tru.

Long dispela taim inap nau, ol Maroons i winim 5-pela Orijin

taitol pinis insait long 5-pela yia.

Stuart i bilip olsem wanpela i nap kamap long gem bilong ol Blues sapos ol i mekim wanpela samting.

Astingting bilong dispela em long skulim na redim ol pilaia bipo long ol i pilaim namba wan Stet Ov Orijin gem bilong ol bihain taim.

"Mi bilip olsem ol tim i save winim ol Orijin gem sapos ol pilaia bilong ol i save na i gat dispela strongpela pasin na tingting bilong stap insait long Stet ov Orijin.

"Mi laik ol i save long dispela bai ol i ken i gat moa respek na laik long kisim dispela NSW yunifom," Stuart i tok.

"Mi save olsem gem bilong ol pilaia long Stet ov Orijin em i mas antap moa long ol arapela gem bilong ol long klap bilong ol we ol i save pilai olgeta wik na mi save dispela ol pilaia tu i save long en na ol i ken redi gut long en," em i tok.

Bikpela samting em i tokim dispela ol yangpela pilaia em long redi tasol na stap i nap taim bilong ol i kamap long makim Stet bilong ol.

Namel long 51 man long skwat bilong Stuart em, Jamal Idris, Jarrod Mullen, Josh Morris, Tim Mannah na Kade Snowden husat ol i nogat planti eksperiens long Stet ov Orijin.

Ol i makim tu Tim Moltzen, Keith Galloway, Jamie Soward, Josh Dugan, Lachlan Coote, Chris Heighington, Kevin Gordon, Mark Minichiello, Akuila Uate na Beau Champion husat ol i putim mak long NRL olsem ol top pilaia.

Tongue na Merritt em tupela longpela taim pilaia namel long ol husat i no save gat sans long pilai bilong Blue, maski ol i pilai gat na toktok i kamap long kisim ol.

Planti ol yangpela pilaia tu husat Stuart i bilip bai kamap gut bihain taim, i stap long skwad tu.

Namel long ol em Tariq Sims, Ryan James, Cameron King, Drury Low, Boyd Cordner na Aaron Woods.


Stuart i laik redim ol bipo long NRL sisen i stat.

Skwad em; Aiden Tolman, Jamal Idris, Josh Jackson, Kris Keating, Trent Hodkinson, Aidan Sezer, Josh Morris (Bulldogs), Blake Ferguson, Josh Dugan, Jarrod Croker, Josh McCrone, Joel Thompson, Alan Tongue, Drury Low

(Raiders), Tariq Sims (Cowboys), Matt Prior, Jamie Soward, Cameron King (Dragons), Tim Mannah, Joel

Reddy (Eels), Cory Paterson, Jarrod Mullen, Akuila Uate (Knights), Tony Williams, Will Hopoate (Sea Eagles), Tim Grant, Lachlan Coote (Panthers), Mitch Aubusson, Boyd Cordner, Kane Linnett, Joseph Leilua (Roosters), Luke Douglas, Kade Snowden, Albert Kelly, Stewart Mills, Nathan Gardner (Sharks), Dylan Farrell, Nathan Merritt (Rabbitohs), Mitch Johnson, Dane Chisholm, Beau Champion (Storm), Ryan James, Mark Minichiello, Kevin Gordon (Titans), Keith Galloway, Andrew Fifita, Aaron Woods, Simon Dwyer, Chris Heighington, Tim Moltzen, Blake Ayshford (Tigers).

SANS: Tongue na Merritt bai gat sans long pilai Stet ov Orijin nau.



Ol kikkoksa redi long 2011

PNG Kikkoksing Asosiesen i makim ol paitman bilong en long makim PNG long ol Intanesenel tonamen dispela yia.

Dispela seleksen i kamap bihain long nesanel sempion sip long Mendi long Disemba 17 i go long 20, 2011.

Presiden bilong PNGKBA na Kickboxing South Pacific (KSP), Stanley Nandex i tok em i amamas long lukim planti ol gutpela pait i kamap long dispela tonamen.

"I gutpela tu long lukim olgeta yangpela manmeri kambung long dispela taim we ol i lainim long soim gutpela pasin bilong spots, respek na amamas bilong provins na kantri bilong ol," Nandex i tok.

Em i tok, wanpela astingting bilong em long kikkoksing em long bungim ol manmeri long trening na stap insait long kain tonamen bai ol i noken mekim ol arapela samting we i ken givim hevi long ol.

Ol etlit i stap long skwad em:

POM/NCD

1 Jimmy Andrew	69kg
2 John Ake	71kg
3 Jack Oltomo	70kg
4 Timmy Unda	85kg
5 David Kayabe	65kg
6 Dickson Dii	64kg
7 Rodney Warea	60kg
8 Leme Stanley	64kg

Mendi

1 Alen Yaren	56kg
2 Bata Kai	54kg
3 Robin Nari	60kg
4 Dicksy Tonomi	62kg
5 Kasol Onggo	61kg

6 Samson Bip	70kg
7 Bimbo Saula	74kg
8 John Noma	70kg
9 Francis Soams	65kg
10 Matrda Medlina	60kg
11 Jesinta Unopa	70kg
12 Rose Paul	60kg
13 Bosteny Pelo	65kg
14 Rami Jack	62kg
15 Janathan Tuha	
16 Rosi Ken	82kg
17 Tunu Obert	60kg
18 Gonopa Junior	48kg
19 Kuni Abednigo	68kg
20 John Numo	60kg

Goroka

1 Oviri Robin	70kg
2 Amex Rayong	
3 Kaupa Omena	

Lae

1 Walege Gilbert	85kg
2 Abel Gangia	57kg
3 Tonny Philip	70kg
4 Emil Moberau	71kg
5 Girian Martin	75kg
6 Makat Kani	40kg
7 Jil Siko	62kg

Mt Hagen

1 Michael Thomson	70kg
2 Andy Sam	74kg
3 Gabi Sam	73kg
4 Jenny Memit	64kg
5 Kennet Kamgu	67kg
6 Isaac Sito	70kg

Simbu

1 Bonny Louise	84kg
2 Dicks Kutne	60kg
3 Jeffery Daka	74kg
4 Peter Bal	50kg
5 Moses Mogia	62kg
6 Nathan Joe	65kg
7 Elis Waim	60kg
8 Kuma Peter F/	
9 John Barawa F/	56kg
10 Ball Moore	65kg
11 Sine Olto	60kg
12 Kelly Peter	65kg

Madang

1 Levi Kambing	56kg
2 Jocelyn Nanni	60kg
3 Beta Kassin	70kg
4 Finden Sale	57kg
5 Ron Palman	57kg
6 Lesly Tolopa	70kg
7 Billy Kaul	72kg

Gobe

1 Lauri Hanku	72kg
2 Stanley Wilson	70kg
3 Kira Wenolu	60kg
4 Ken Hanksman	64kg
5 Ian Tom	73kg
6 Job Mindi	75kg
7 Andy Linstan	80kg
8 Rodney Ope	70kg
9 Charlie Joe	84kg

Dispela skwat i gat ol sinia na junia paitman na meri wantaim na ol bai stap insait long ol intanesenel tonamen long level bilong ol.

I gat sapot bilong ol Para-etlit

OL paralimpik etlit tu i save wokhat long karim nem bilong Papua Niugini long ol bikpela spots tonamen tasol i nogat planti luksave i save go long ol.

Tasol ol i kisim wanpela bikpela helpim long Tunde dispela wik long Nesanel Spots Institut (NSI) long Goroka taim BSP benk i tokaut long nupela sponsa bilong en long ol.

Menesa, Kopret Sponsasip bilong BSP, Rosemary Mawe i bungim ol etlit na opisal bilong PNG Paralimpiks Komiti long NSI na i givim ol K100, 000 bilong ol

program bilong ol dispela yia.

Dispela sponsasip bai ron inap tripela yia na bai stat long 2012.

PNG Paralimpik Komiti bin kamap wantaim ol etlit bilong ol long NSI long ol etletiks trail bilong ol.

Ol kosa na refri bilong pawalifting tu i bin kisim trening bilong ronim na lukautim ol etlit bilong ol.

Presiden bilong PNG Paralimpik Komiti, Bernard Chan i gat wanpela toktok tasol long maus bilong em taim em i kisim dispela toksave; "Tenkyu."

Na em i tok tenkyu planti taim tru

taim em i givim toktok bilong em.

"BSP i luksave olsem ol paralimpik etlit i save bungim planti hevi taim ol i laik redi long go long ol bikpela nesanel na intanesenel tonamen olgeta yia na mipela i amamas long helpim yupela long kisim gutpela samting long ol spots bilong yupela," Mawe i tok.

"Mipela i sapotim Paralimpiks bilong wanem mipela i laik bai ol turangu etlit tu i ken luksave long ol driman bilong ol long spots," em i tok.

Paralimpik spots i putim nem bilong PNG wol tut aim etlit, Francis



Kompaon i winim silva medol long 2006 Komonwelt Gems na tu long 2008 Olimpik Gems.

AMAMAS: Ol paralimpik etlit i soim sek mani BSP givim ol. FOTO: BSP.

Ol klap mas wok hat moa

■ i kam long pes 28

Em i tok kompetisen bai kamap strong moa na bai apim level bilong gem insait long PNG moa yet sapos ol tim i wok strong long wanwan eria bilong ol yet we ol i no strong tumas long en.

Kapi Natto i tok tu olsem ol klap i ken kisim ol intanesenel pilaia bilong ol arapela kantri kam pilai wantaim ol tu sapos ol i gat inap mani long mekim.

"Ol intanesenel pilaia i save givim 100

pesen (%) bilong ol stret long pilai na trening na i ken mekim ol lokol pilaia bilong yumi tu i traim hat long bungim ol.

"Dispela bai helpim long developim ol pilaia bilong yumi na tu gem bilong yumi," em i tok.

Antap long dispela, NSL em i profesenol gem na ol tim i ken kisim wanem ol pilaia ol i laikim i kam pilai wantaim ol tasol ol i mas i gat i nap mani long baim ol.

Hekari gat planti ol pilaia bilong

Solomon Ailans, Fiji na PNG yet i save bung wantaim na pilai long NSL na O'lig tim bilong en.

Kapi Natto i tok isi isi bai planti bilong ol dispela ovasis pilaia i go bek na wanwan tasol bai stap bek.

Long Trinde dispela wik, National Gaming na Control Board (NGCB) i givim K200, 000 long wok developmen bilong NSL.

"Mipela i bilip long soka olsem spot we bai strongim kantri bilong wanem em i

soim rot long gutpela NSL resis bilong en na tu strong bilong Hekari long makim kantri long klap wol kap," siaman bilong NGCB, Leonard Louma i tok.

Kapi Natto i tok Hekari kamaut long NSL na sapos i gat moa sapot olsem, bai planti moa tim i ken kamap olsem Hekari na i go moa.

Ol i lukluk tu long kamapim NSL bilong ol meri dispela yia na dispela mani bai helpim ol wok redi bilong dispela resis bilong wanem ol meri nogat sponsa yet.



SPOOTS



Isu 1900

Wan wik: Fonde, Jenuari 20 - 26, 2010.

Besta *Tuna em tasol, em best ya!*

Stars ronim Hekari

Ol klap mas wokhat moa

Andrew Molen i raitim

TUPELA pouns tasol i stap namel long Hekari United FC na Easter Stars FC long Nesenel Soka Lig.

Hekari go pas wantaim 13 poin na Stars i bihainim long namba tu ples wantaim 11 poin tasol dispela em i wanpela samting tasol we i putim ol Stars baksait tasol long nambawan klap bilong Papua Niugini.

Ol i wokhat tu long ol arapela eria long sait bilong strongim klap bilong ol.

Dispela em i wanpela samting

we NSL siaman na tu papa bilong Hekari, John Kapi Natto i luksave long en na i amamas long em i kamap.

"Hekari kamap wanpela strongpela tim insait long NSL bilong wanem ol i save wokhat tru.

"Ol menesa, kosa, trena na ol pilaia tu i save wokhat tru long wanwan wok bilong ol insait long klap," Kapi Natto i tok.

"Mi laik lukim wankain hatwok na strongpela tingting bilong win i mas kamap long ol arapela tim tu," em i tok.

Kapi Natto i tok em i lukim olsem Eastern Stars i wok long kisim dispela pasin nau olsem na gem bilong ol i wok long

kamap strong tu. "Mi lukim Eastern Stars i wok long wokhat olsem Hekari nau na mi laik ol arapela i mas bihainim.

"Em i gutpela long lukim ol kosa, menesa na ol arapela memba bilong klap i wokhat moa nau long lukim olsem klap bilong ol i mekim gut insait long dispela kompetisen," em i tok.

Moa long Pes 27.

KAMAP: Michael Foster bilong Stars i laik ronawe long Koriak Upaiga bilong Hekari. Ol Stars na ol arapela klap i ken kamap strong olsem Hekari.



POTO: WANTOK POTO.

Johnston's Pharmacies

For First Aid Kits. Red8 Body Bulk Protein Supplements. Thompson Vitamins, Bandages, Strapping Tape, Mouth Guards.

All Sport and First Aid requirements.



P.O.Box 1066 Boroko.
Phone 325 3185. Fax 325 0190.
Email sales@johnstons.com.pg."